

سنه أولى برلمان



بفلم / فييه البكري

بِسْمِ اللَّهِ الرَّحْمَنِ الرَّحِيمِ

كانت انتخابات عام ٩٥ من القرن الفائت مشهودا لها بالدموية والبلطجة من قبل الحكومة آنذاك .
ولقد ازهقت ارواح كثيرة من الشباب وغيرهم نتيجة أعيره نارية طائشة
ومر عام ٩٦ والحزب الوطني يملك أغلبية المقاعد وقليل من المعارضة [اطلق عليها آنذاك بالديكور]
لم تملك من امرها شئ فقد كانت سباحة ضد التيار الذي يجرف البلاد والعباد الى هاوية سحيقة لا يعلم
مداها إلا الله ،،

كانت ديمقراطية مفصلة على القد ، وهذا القد كان به من السمنة والترهل وتعب المفاصل التي تحمله
ما يجعله مضحك مبكي ، يالتلاحق الانفاس كلما مشى صاحب هذا القد خطوة او خطوتين ، بينما كانت
الجاراة اللدود إسرائيل واعدة في نفس هذا العام بأنتخابات حرة نزيهة اتت بنتينيا هو اليميني والذي اثار
جوا سياسيا فضح سياسات العرب جميعا ، متمثلا في بناء المستوطنات علنا وليس سرا كسابقه ، فلا
يملكون سوى الشجب والانكار في تصريحاتهم ، سواء في المحافل الدولية او المحلية ، كل هذا لا يهم
حكومتنا في شئ لطالما معاهدة السلام قائمة ، الذي يهمها بالدرجة الأولى هو كيف تقضى على أنفاس
من يملكون رأساً يريد أن يبرز على سطح السياسة أو دعى للإصلاح وكان على رأسهم الأسلاميون ،
وذلك بداعي [القضاء على الأرهاب] .

لذا رأيت ان اسجل تلك الحقبة من التاريخ المؤسف لحياة برلمانية تمثل بالكذب شعبا عريقا يسوسه
حفنة من العملاء ، ورأيت ان اجعلها مسرحية موضحة ، وليس بالرموز او الأدب الرمزي الذي يلجأ
إليه الكثير ممن يكتبون في مثل هذه الحالات ، وبم ان هاؤلاء قائلون على الأمر آنذاك ، رأيت ان هذه
المسرحية لن تجد النور، وبما ان ثورة ٢٥ يناير كانت فاصلا تاريخيا ازلت عرش هاؤلاء ، رأيت ان
يبرز هذا العمل الذي خط في عام ٩٦ الى النور، مستضياً بضياء هذه الثورة المباركة .

بقلم

نبیه أبو اليزید البکری

ابطال المسرحية

الحاج عشاوى : رجل يتصف بصفات معلمة السوق والتجاره و الجدعنه ، عرف عنه انه رجل خير يقصده زوى الحاجه ، فهو تاجر جملة طيب القلب يحب الاصول لذا كان محبوبا من الناس و يترشح لمجلس الشعب بطريقة غير مقصوده منه ، وفجأه يجد نفسه فى معمعة لم تكن بحسبانه بدايه من دخوله الانتخابات ونجاحه الدرمايكي ودخوله مجلس الشعب

عائلة العبادى : عائله لها باع طويل فى ممارسه الانتخابات منها **رجلان الاول**

المستشار سليم العبادى ، وهو رجل فقيه للاحكام المدنيه ويعد عراب العائله رغم انه لم يخض الانتخابات ، إلا انه الموجه الاول لترشح اخوته فى الانتخابات ولما مات اخوه محمود متأثرا من هزيمته امام غريمه المغمور الحاج فتحى العماوى ، كان صاحب المشورة بترشيح الحاج عشاوى للانتخابات ضد الحاج فتحى العماوى ، لما له من حب فى قلوب الناس
الحاج حمزة : اخوه للمستشار سليم ووافقه الرأى بهذا الترشيح
عائلة العماوى : مكونة من اكثر من فرد

الاول : الحاج فتحى العماوى ، الذى نجح فى الانتخابات فى المرة الأولى وكانت ضد محمود العبادى الذى مات على أثرها ، وهو رجل لا يبالي كل همه هو مصلحته الخاصة من وراء دخوله مجلس الشعب ، ولذا كان غير محبوب من أهل الدائرة

زعزوعة : اخوه من الام خاب امله فى الحاج فتحى وصاحب ضمير وسجيه لطيفه جدا
سلامه : أحد رجاله المتعجبين لامره

نواب المجلس

الاول- الرئيس : الذى يبدو دائما فوق المنصة ويدير الحركة البرلمانية وهو صاحب أبتسامه مأكرة دائما

الثانى- النائب محمود نصر : وهو مثقف ويعلم بقوانين المجلس وهو فى واد وما يحصل على ارض الواقع فى واد آخر

الثالث – الحاج عباس : نائب لا يقدم ولا يوخز مندفع كالثور دون فهم ، صاحب مصلحة ومقاولات

الرابع – فوزى : رفيق للحاج عباس إلا انه متريث ويحاول كبح جماح الحاج عباس

الخامس – محمد طایل : نائب مثقف يحاول الادلاء بدلو ولكن يرفض من قبل رئيس المجلس

السادس – النائب عبد العزيز

السابع – النائب سالم

الثامن – النائب أسعد

التاسع – النائب محمود: رفيق للحاج عشاوى ويحاول تبصرة الحاج عشاوى ببعض الامور

الغامضه عليه ، وهناك اكثر من نائب يتدخلون فى الحوار

وكذلك الصيدلى

واحدى النائبات

ورئيس لجنة الشئون الدستورية والتشريعية

والنائب سالم النجار : أحد المغضوب عليهم من قبل الحكومة

وكيل المجلس

وكثير من الشخصيات داخل المجلس على اختلاف مستشاريهم

عمال الحاج عشاوى

زينهم شخصية غامضة يفتعل العبط والسخرية لأجل مصلحته وهو خبيث جدا

سعيد : شاب محاسب يعمل براتب تقاعدى لاتعجبه ادارة الامور لدى الحاج عشاوى ولكنه مخلص

زوجة زعبلة : بنت بلد عن غير قصد تقلب طاولة الخبائة على رأس زينهم

الفصل الاول

المنظر الاول

[يفتح الستار عن مخزن كبير ملئ بالأشولة المرصوفة بنظام والكراتين المختلفة الاحجام لبضائع عديدة ، البيع فيه بالجملة

هناك اربعة حمالين يجيئون ويزهبون ، يحملون على أكتافهم من الكراتين والاشولة من باب جانبي ، فى ركن المواجهة يوجد مكتب متواضع يجلس عليه اثنان فى زى بلدى ينتظران ، يقف بالقرب من الحمالين محاسب شلب وفى يده دفتر سجلات يسجل فيه انواع البضاعة الخارجه والوارده ، بالقرب منه رجل ذى طول محنى قليلا فى الخمسينات من عمرة بجلباب صعيدى فى حركة دائبة يراقب ما يخرج من بضاعة]

المحاسب (اسمه سعيد) [موجهها كلامه الى زينهم صاحب الجلباب الصعيدى] ايه عندك بضاعة خارجه يا زين

زينهم : عندك مكرونه ١٥ + ١٠ بجبه أسود + ١٢ فاصوليا ، والكراتين عندك ١٦ زيت

سعيد : ماشى [وهو يسجل] بالنسبة للسكر

زينهم : عندك ٢٢ يحملوا فيها [تسمع اصوات من الخارج]

زين [يتترك المحاسب ووجهه يتهلل يذهب بسرعة نحو المكتب ليمسح بكم جلبابه ، فى حركات استفزازية بعض الشئ تثير الجالسين فى تعجب من امره ، خاصه حينما يلتقط قطعة قماش ويضرب بها على سطح المكتب فيثير الغبار عليهما] لا مؤاخذه يا بلديات اتفضل يا حاج أتفضل يا حاج [ثم ينفذ الكرسي المواجه ليجلس عليه الحاج] [يدخل الحاج عشاوى عليه عباءة برتقاليه وعمامة بإحكام على رأسه وشال أبيض يتدلى على صدره]

الحاج عشاوى : السلام عليكم

(سلم على الشخصين ويتجه نحو الكرسي)

(وهو يشير بيده) أتفضلوا هات شاي يازينهم للضيوف

أحد الضيفان : الله يبارك فيك يا حاج

الحاج عشاوى : منين أنشاء الله

الاول : احنا يا حاج من أشمون طرف الحاج خولى

الحاج عشاوى : أهلا وسهلا

الاثنان : أهلا بيبك

الحاج عشاوى : وأخبار الحاج محمد أیه

الاول : عال قوى ماشاء الله عليه ربنا يفتح عليه من أوسع الابواب

الحاج عشاوى: هو لسه ماشى فى تجارة القماش

الثانى : ماتتساش انه بقى عضمه كبيره ، وربنا يخليلوا ولاده ، فاتحين كذا محل أصلهم ولاد حلال

ومتعلمين

[يدخل صبى فى يده الشيشه واليد الثانية صينية شاي عليها ثلاث أكواب من الشاي ، وضعها على

المكتب والشيشه بالقرب من الحاج على جانب المكتب]

الحاج عشاوى : أتفضلوا الشاي (وقدم لكليهما كوبه الشاي)

كليهما : الله يزيد فضلك يا حاج

الحاج عشاوى : مرة زمان الحاج محمد أترشح فى الانتخابات ومحصلش نصيب

الأول : والله يحاج الانتخابات دى لها ناس وناس ، رغم ان الدايره وقفت مع الحاج محمد بس مفيش

نصيب أزاي متعرفش ، وعموما له ابن مستشار مرشح نفسه وناوى يدخل الانتخابات وبصراحة

محبوب من أهل الدايره

الثانى : الصراحة هو بيشكر فيك قوى يا حاج

الحاج عشاوى : (بعد أن شد نفسا طويلا ووضع المبسم على صدغه متأملا للحظه)

عشرة طويلة (ثم هذ رأسه) تصدقوا ١٥ سنه مشفناش بعض وكأنه لسه أمبارح

الاول : ياه مده طويله

الحاج عشاوى : لكن أنتم فاتحين جديد

الثانى : من حوالى شهرين

الحاج عشاوى : ربنا يجعله مبارك

[يقترب المحاسب من المكتب ويضع امام الحاج عشاوى دفتر الحسابات التى سجل فيها الطلبيه]

المحاسب : أتفضل يا حاج

الحاج عشاوى : (ينظر فى الدفتر) ٨٥٧ جنيه وتلاتين قرش

الاول : (أخرج محفظته من صدره على هيئة سره مربوطه ثم أخرج عدد من الرزم النقدية ، وهو يعدها واحدة تلو الاخرى امام الحاج عشاوى) واحد مالوش تانى ، تلاته ، أربعة ، خمسة ، ستة ، سبعة ، ثمانية (ثم فك رزمة من فئة العشرة ثم عدها هي الاخرى) أتفضل يا حاج

الحاج عشاوى : ماتخلى علينا

الاثنان : مشكرين يا حاج

الحاج عشاوى : (موجهها كلامه الى الحمالين) كله جاهز

زينهم : جاهز يا حاج

الاثنان : (ينهضان ويسلمان على الحاج الذى ينهض بدوره) إحنا مشكرين يا حاج على الضيافة

الحاج عشاوى : ياريت تشرفونا دايمًا والمحل تحت أمركم ، وبالمرّة ياريت تسلموالى على الحاج

محمد (لأحدهما) وتقول له الحاج عشاوى مش ناسيلك صينية الرقاق اللى كانت وش السعد

الاثنان : (يضحكان) سلام عليكموا

الحاج عشاوى : وعليكم السلام مع ألف سلامة

(وهما خارجان يضع أحدهما يده فى جيبيه ويخرج ورقة نقديه يضعها فى يد أحد الحمالين وأشار

بتوزيعها عليهم)

الحمال : (فى سرور) مع السلامه

[بينما كان الحاج عشاوى منهمك فى مراجعة بعض الحسابات مع "سعيد" المحاسب ، كان الحمالون

يجلسون بجانب غير بعيد بجانب البضاعة ، ويبد كل واحد منهم طبقًا من الكشرى ، كانوا يأكلون بنهم

، وزينهم يقف بالقرب مترقبا ، ازداد اقترابا منهم ، كانت عيناه مشدودة اليهم ، كانوا يلحظون عليه ذلك

رفع أحدهم ملعقة الى فمه ليزدرد ما بها ، وعينه على زينهم الذى بالتالى فتح فمه لاشعوريا فى

الهواء ، فى حالة ادخال زميله الملعقة الى فمه وتساقط أطراف الشعرية ، أعاد زميله الكرة ثانية

وأعاد الملعقة الى فمه ، ولكن هذه المرة لا يلتهم ما بها ، ليرفع زينهم رأسه لأعلى فاتحا فمه وظل معلقا

لتعلق الحمال بملعقته]

الحمال : (بصوت عالى) إيه ده

زينهم : (سرعان ما أقفل فمه وبلع ريقه خجلا) فين البكشيش

الحمال : ماهو بنطفح بيه أهوه

زينهم : طب فين طبقى

الحمال : (ضاحكا هو وزملائه) على السطوح دور عليه

أقولك خد (وناوله من بين الاشوله طبقا من الكثرى)

[يخرج الحمالون واحد تلو الآخر من الجانب ويبقى زينهم]

(صوت يأتى من بعيد)

[ثم تدخل امرأة دافعة أمامها طفلين] (ترتدى لباس بلدى)

المرأة : بلاش شقاوة يسلامه انت وسعدة

(الطفلان يدخلان داخل المخزن ويحاولان عبثا القفز فوق البضاعة المتراصة)

زينهم : (الذى كان يأكل بتؤده) على فين ياد انت وهى (ويقوم بسرعة)

المرأة : مش هو ده المكتب

زينهم : على فين يا حرمه

المرأة : حرمة (قالتها بصوت مشوب بالسخرية) حرمت عليك عشتك مش ده برضه مكتب الحاج

طناش

زينهم : طناش!!!!!!..... طناش مين يا ست

المرأة : الحاج عشاوى يا خويا (بسخريه) اللى بيوصل الرحم ويشيل الغلابه،

وينصر المحتاج

[الحاج عشاوى كان يلاحظ ما يجرى فى صمت ، الى ان انتهت المرأة من كلامها]

الحاج عشاوى: أيوه يا ست أتفضلى

(فى تلك اللحظة كان الطفلان يقفزان بشقاوة فوق الاشولة ، وزينهم اتجه نحوهما يحاول الامساك بهما

، وهما يحاورانه بخفة)

الطفل : (أمسك بكيس من المكرونة ليذف به لأخته) امسك يا سعدة

الطفلة : أرمى (ثم تلحق بالكيس قبل ان يصل اليه زينهم) يسلامه (وترمي به ثانية لاختها فتصيب

وجه زينهم)

الحاج عشاوى : (وقد رأى بعينه ما يجرى) ايه ده يامهيب

زينهم : (وهو يغطى عينه بيده) زى مانت شايف يا حاج ها يبهدلوا البضاعة

الأم (المرأة) : إخس عليكوا كده يسلامه انت وسعدة ، دى أصول ، الحاج يقول علينا ايه (تذهب

ناحية زينهم) جات سليمة يا خويا

زينهم : بسيطة يا ست

(يقف الطفلان مستكينا جنب امهما التى مازالت واقفه)

الحاج عشاوى : أتفضلى يا ست (مشيرا لها نحو الكرسى)

المرأة : زعبة يا حاج (بصوت مؤثر)

زينهم : أنتى يا ست مرات زعبة

المرأة : ابوه يا خويا

الحاج عشاوى : زعبة ؟..... مين زعبة

المرأة : جوزى يا حاج اللى كان يشتغل هنا ووقع عليه شوال عتس كسر ظهره (كان صوتها حزين)

الحاج عشاوى : (وهو يتذكر) آآ الحادته دى من حوالى شهرين (وفى تلك اللحظة وضع زينهم يده

الشمال على رأسه وأخذ يضرب بيده اليمنى عليها ضربات خفيفة وكأنه حصلت مصيبة)

المرأة : (مازال صوتها حزين) أهو من يومها يا حاج وحالته لا تسر عدو ولا حبيب

(يزيد زينهم من ضربات يده فوق رأسه ويلفت ذلك نظر الحاج)

الحاج عشاوى : مالك يا مهيب

زينهم : (ينزل يده) مفيش يا حاج أصلى بضرب الودع

الحاج عشاوى : طب أتهبب اقعد (موجهها كلامه للمرأة) أيوه يا ست

المرأة : ولاتنهان يا حاج من يومها قاعد زى دكر البط الفطسان (فى تلك اللحظات اتخذ زينهم مكان

بعيد عن عين الحاج بحيث يترأى للطفلين وأخذ يشاور لهما أن تعالا)

الطفلان (أخذ ينظران إليه مره والى أمهما مره ، وفجأة أنطلقا نحو البضاعة) هيه هيه (وهما

يتقافزان)

الأم (المرأة) : واد يسلامه بت ياسعادة (وقامت لتمنعهما)

(يقوم زينهم يطاردهما وهما يحاورانه و يحدث مثلما حدث فى المرة الاولى ويصاب فى وجه)

زينهم : أى ياولاد الأبالساة

الأم (المرأة) : أخس عليكوا معتش أخدمك معايا تانى أبدا (توجهت نحو زينهم يغطى عينه) بسيطه يا

خويا

زينهم : لا مركبة يا ختى

الحاج عشاوى: (للمرأة) ماشى يا ست هاتى العيلين جنبك ولا أقولك هات كرسيين يا زينهم يقعدوا عليهم (يجئ زينهم بكرسيين ثم يجلس عليه الطفلان) هات فحمة للحجر بالمره (ثم أخرج الحاج عشاوى قطعتين من الشيكولاته وزعها عليهما) إيه رأيكم عشان تقعدوا ساكتين (موجها حديثه للمرأة) أصل عندى ولاد بنتى شاقيين زيهم

المرأة: ربنا يخليك ويتربوا فى عزك يا حاج

الحاج عشاوى: النار يا مهيب ، وهات شاي وحاجة ساقعة للولاد (يجرى زينهم خارجا) أيوه يا ست قلتي زى دكر البط الفطسان

المرأة: (بنبرة حزن عميق) بعث با حاج حنتين الذهب اللي عندى كنت شايلاهم للزمن لغاية اما العيال يكبروا ويتعلموا ، ضاعوا فى الف والدوران على العيادات والمستشفيات **الحاج عشاوى:** (مقاطعا المرأة) لو سمحت (وبصوت جهورى)

زينهم ، انت يامهيب

زينهم: (وهو يجرى بالفحم المشتعل على صينية) أيوه يا حاج

(ثم قرص نحو الشيشة يجهز نار الحجر وتزويده بالمعسل)

الحاج عشاوى: عايزك تسمع

زينهم: أمرك يا حاج

الحاج عشاوى: أيوه يا ست كملى

المرأة: متنهانش يحاج فى الآخر خالص قالوا ده هيعمل عملية بس حتكافكوا كثير ، وحظكوا الحلو فيه

دكتور أجنبى جاى فى زيارة لمصر ممكن تحجزوا عنده ، هو ده اللي حيعملها ، واديني قلبك اصبر

بيه يا حاج اللي قدامى واللى ورايا بعته ، زعبة قاللى روحى يابت يازوبة على الحاج وأقصديه ،

يمكن يطيب خاطرک (وفرت الدموع من عين المرأة)

الطفل: (قام واقفا على الكرسى) انت بتعيط ماما ليه

الحاج عشاوى: (وقد فوجئ بسؤال الطفل ابتسم فى حرج بالغ ثم امسك الطفل من وسطه ورفع

امامه على المكتب ثم اجلسه) لا ياراجل انا برضه أعيط ماما ، داهى اللي بتضحك

الطفل: امال بتنزى دموع ليه

المرأة: (بسرعة تحاول ان تنهى الموقف الحرج الذى أوقفت فيه الحاج عشاوى) لا يسلامه أنا

بضحك أهوه (ثم تبتسم فى تكلف واضح)

الطفل : أمال بشوفك تعيطى ليه واحنا نايمين بالليل

المرأة (الأم) : (فى حرج أشد) أنى بعيط

الطفل : آه بأمرة ما بابا بيقولك كان نفسى أعلم الولاد الكمبيوتر فى المدرسة يا ذوبه

المرأة (الأم) : طب اصل انتا لسة صغير اما تكبر شويه هاتتعلم الكمبيوتر

الحاج عشاوى: (وهو يمسخ عرقه من الخجل) طب يا ست ذوبه روحى دلوقت وانى جاى الليلة

(موجها كلامه الى زينهم فى سخريه) مش بتعرف البيت يا زينهم

زينهم : هيه!! لا إيوه يحاج

المرأة : (وكأنها تذكرت شئ) هو انت زينهم

زينهم : إيوه يا ست فى حاجه

المرأة : زعبولة جوزى موصينى ، بت يا ذوبه ما تنسيش تقولى لزينهم عملت ايه فى الاوضه اللي

فوق السطوح فوق عمارتك (موجهة حديثها الى الحاج عشاوى) أصل يا حاج قاعدين فى أوضة

جنب بير السلم ، الرشح طلع علينا والرطوبة اكلتنا

زينهم : (فى استنكار) أوضة ايه و عمارة ايه ، تخاريف ايه دى ، يمكن عشان زعبولة تعبان بيقول

كلام كده وكده

المرأة : يعنى بيخرف يا اسمك ايه ، لما بيقول عندك عمارتين وانك مواعده ياخذ أحسن أوضه على

السطوح

زينهم : يا ست انتى جايه ترمى بلاويكى علي ؟.... أنى شكل واحد عنده عماير

المرأة : يا خويا دا تغور من وشك لو كانت قصر (يدخل صبي القهوة بالطلبات ويضعها فوق المكتب)

الحاج عشاوى: اتفضلى يا ست ذوبه

المرأة : اتفضل ايه بقى يا حاج ، فتك بعافيه (ثم تأخذ ولديها وتدفعهما برفق أمامها وهما ينظران نحو

صينية الطلبات ، وعليها الشاى وزجاجتين المياه الغازية ، من ثم يعلم الطفلان أن زينهم هو الذى

أغضب أمهما ، فكان ذلك سببا فى أنها استعجلت أمر انصرافها قبل تناولهما المشروب المفضل لهما ،

فما كان من الطفل سلامة الى انه جرى نحو زينهم فى غفلة عنه ليعضه فى مؤخرته)

زينهم : آى آى خد وقف يابن الـ

(يجرى الطفل نحو أمه)

الحاج عشاوى: (اخرج من يده شيئا من الاوراق النقدية ودسها فى يد المرأة)

عموما انا جاى الليلة وربنا يقدم اللي فيه النصيب

المرأة : الله يجبر بخاطرك يا حاج (ثم تخرج والطفلان)

الحاج عشاوى : مع السلامة

(يجلس الحاج الى الكرسي ، ويصوب نظرة غضب إلى زينهم ، يمسك بمبسم الخرطوم ويسحب نفسا

فلا يخرج دخان) غير الحجر يا مهيب

زينهم : (في اضطراب) حجر حجر طب حاضر حاضر

(يجرى نحو الباب ينادى على صبي القهوة ثم يعود)

الحاج عشاوى : أقعد

زينهم : (مازال واقفا وفي حالة اضطراب زائد)

الحاج عشاوى : (في غضب) اقعد يا مهيب

زينهم : (يجلس على كرسي قريب) نعم يا حاج

الحاج عشاوى : قرب هنا

(زينهم يقترب من الكرسي في حذر بالغ)

الحاج عشاوى : (ينهض من مكانه ويقترب نحو زينهم ، ويمد يده نحو رقبته ويضغط عليها ويكاد

يحمر وجه زينهم)

كل ده يطلع منك وانا اللي عاملك امين على أموالى وواتق فيك (وهو يهزه بشدة) فين التلات تلاف

جنيه ، رد انطق

زينهم : (وهو يتألم من شدة الأمساك) ح حقول بس سبنى

الحاج عشاوى : (يتركه بعد أن يدفعه ويقع على الأرض) يا لص

زينهم : (يحاول التهوض ثم يقف وهو يزدرد ريقه الناشف ، ويتحسس مكان الألم فى عنقه) ما هو

يحتاج أنى جهزت بيهم الأوضة اللي على السطوح عشان يسكن فيها

الحاج عشاوى : تلات تلاف تجهز بيهم أوضة على السطوح ، وهو مش لاقى حق العلاج ، فين

تروح من ذنب الولاد المساكين ، ذنب مراته اللي باعت مصاغها ، ذنب الراجل اللي نايم زى دكر

البط الفطسان ، خلاص مافيش رحمة ؟ فى الرايحة والجاية ، يا حاج المستشفى طالب ٥٠٠ ماشى خد

و يا حاج الدكتور الفلانى طالب ٤٠٠ ماشى خد يا حاج العلاج حقه ٢٠٠ ماشى خد ، عمال على بطل

تحلب فى ، وأقول ماشى طالما بفايده اقول مش مهم الفلوس ، وفى الآخر يطلع لا انت عارف الست
دى ولاهى عارفاك

كنت بتاخذ الفلوس دى زى إيه

زينهم : والعيش والملح يا حاج كنت بكمله على الاوضة

الحاج عشاوى : طب ليه نكرت منها الأوضة

زينهم : ما هو بصراحة يا حاج كسفتنى قدامك وكشفت أسرارى

الحاج عشاوى : (بنهكم) أسرارك ، يعنى صحيح بانى عمارتين وأنى اللى بانى عمارة مش عارف
أشطبها

زينهم : يا حاج صدقنى خواتى هما اللى بيبنوا مانت عارف هم اللى تعلموا وأخدو شهادات وهم اللى
سافروا وأنى اللى كنت كبيرهم (فى نبرة حزن) على يدك ياما جريت عليهم ، أشتغلت صبى قهوة ،
وصبى ميكانيكى ، ياما شلت على دماغى عيش عشان أوفرلهم مصروف المدارس ، وعلى يدك
أتجوزت وسنى أربعين سنة مفيش واحد فيهم فكر يساعدنى بمقدم شقة ، وعشت ولسة عايش تحت
الأرض

الحاج عشاوى : انت من بكرة ترجع حمال تانى لأن ارواح الناس مش لعبة فى أدينا

(ينادى) ياد يا بحيرى

الحمال : نعم يا حاج

الحاج عشاوى : من بكرة تاخذ مكان زينهم (موجهها كلامه للمحاسب) وانت يا أستاذ سعيد توقف
معاك بحيرى من بكرة (موجهها كلامه الى زينهم) يالله غور علله تفتس يا بعيد (موجهها كلامه الى
بحيرى) تعرف عنوان زعبلة يا بحيرى

بحيرى : أيوة يا حاج

الحاج عشاوى : الليله تودينا عليه

بحيرى: أمرك يا حاج

[ينصرف بحيرى وزينهم يتبعه خارجا ، لم يوجد سوى الحاج عشاوى

والمحاسب سعيد]

الحاج عشاوى : (يجلس الى كرسيه على المكتب) حصل اللى حصل يا أستاذ سعيد وانت لاحس ولا

خبر

سعيد : وايه المطلوب منى يا حاج

الحاج عشاوى : تتكلم تقول حاجه

سعيد : اقول آيه يا حاج وعلى يدك خمس سنين خاطب مش لاقى أوضه على السطوح

الحاج عشاوى : مش بقصد اتهمك يا سعيد انت راجل متعلم وابن اصول

سعيد : ماهو ده رأس مالى فى الحياة (كان لا يزال واقفا فجلس الى اقرب كرسى مقابل الحاج) انا

أهلى علمونى مش علشان اسرق ، وبعدين انت يا حاج اللى راجل طيب قوى

الحاج عشاوى : كل قصدى انا ظلمت زينهم ؟

سعيد : ايوه يا حاج انت ظالم الكل من زمان

الحاج عشاوى : معقولطب أزاى

سعيد : أولا لو راح زينهم بيحى زينهم لأن الناس دى خايفة من المستقبل مفيش أمان

الحاج عشاوى: (فى تعجب) انا عمرى ماكنت بخيل مع حد من العمال أحسن رواتب ، غير

البكشيش غير الاعياد والمواسم ، سلف ماشى ، لو واحد تعب ولا لاقدر الله حصلت له مصيبة سداد ،

إيه اللى ناقص تانى

سعيد : يا حاج الخوف من المستقبل الغول الأيام اللى جاية ، ده اللى يخلى زينهم ينهب من وراك ،

واللى خلى مرات زعبة تيجى تطلب الرحمة بين ايديك

الحاج عشاوى : يا سعيد انت بتكلمنى بالألغاز (ينهض من على الكرسى) ماتفهمنى إيه حكاية

الخوف والامان والمستقبل

سعيد : تقدر تقولى يا حاج لما يچى موظف التأمينات عمالك ليه بيهربوا ؟ اللى يجرى فى الشارع

واللى يدخل الحمام ، عمرك يا حاج شفت محاسب حاصل على بكلاوريوس تجارة يهرب فى دورة المياه

الحاج عشاوى : وده حصل فىين

سعيد : (مشير على نفسه) محسوبك

الحاج عشاوى : إزاى

سعيد : مرة من المرات هربت فى دورة المياه اللى جنبنا (وأشار الى ركن قريب)

طبعا داخل ومش فى بالى اللى بالى بالك ، آهو لغاية مايمشى ، وفجأة التخبيط أشتغل

الحاج عشاوى : إيه اللى حصل

سعيد : جانى اللى بالى بالك

الحاج عشاوى : أوه

سعيد : وحياتك يا حاج هو يخبط وانى أرد عليه ، يخبط وانى أرد عليه

الحاج عشاوى : (فى تعجب) ترد عليه ازاي واصلا حرام الكلام فى الحمام

سعيد : يا سلام يا حاج طب إيه قولك ثلاث اربع من اللي بيغنوا الأيام دى ، أول ما بدأوا كان فى الحمام

الحاج عشاوى : إزاي طيب !!!

سعيد : لا دانتة ما عندكش فكرة ، تعرف يا حاج ان الحمام بيحل مشاكل كثير قوى ، يعنى متستغربش

لما تروح لدكتور نفسانى ويقولك ساعة اما تحس بمشكلة ، أهرب للحمام، يعنى أكثر المتجوزين بس

دول الناس اللي فوق (وهو يشير لأعلى) فوق فوق لما كان يهرب من زوجته ، ياخذ معاه المجلة أو

الجرنال وياخذ معاه القهوة وعلبة السجاير ، وأهم من ده كله النضارة كعب كباية على عنيه ، يا سلام يا

حاج قد إيه بيحس بالأمان

الحاج عشاوى : تانى الأمان

سعيد : فى واحد من شدة شعوره بالأمان كان ناسى انه موصل محبس الغسيل بالسخان

الحاج عشاوى : إيه حصل

سعيد : لا إنسى اتبخر

الحاج عشاوى : طب وايه اللي حصل معاك

سعيد : مالمقبتش منه فايده فتحت الباب ، ولسة طالع من الباب اتقفل على رجلى

الحاج عشاوى : طيب يمكن الراجل كان

سعيد : كان إيه يا حاج

الحاج عشاوى : يعنى كان مزنوق

سعيد : مزبوط يا حاج كان مزنوق (صمت قليلا) عشان كده انا قلت فى نفسى ليه العمائر بتقع من

غير زلزال

الحاج عشاوى : يعنى عايز تقول لو ان العمال متأمين عليهم يكون عندهم أمان

سعيد : على الأقل ماكانش واحد زى زينهم عمل اللي عمله

[يدخل بحيرى ويقترّب من الحاج]

بحيرى : المستشار سليم العبادى وابن عمه الحاج حمزة

الحاج عشاوى : طب خليفهم يدخلوا ليه واقفين ؟ (موجهها كلامه الى سعيد المحاسب) خلص انت مع الزباين

[سعيد ينتقل بالكرسى بالقرب من البضاعة ، والحاج يجلس الى كرسيه امام المكتب وقد تهيأ لمقابلة الضيوف]

(يدخل رجلان أحدهما ببذلة فيه بعض السمنة ، والآخر بجلباب بلدى تدل هيئته على انه تاجر وابن سوق ، يقوم الحاج عشاوى ليرحب بهما بكل حفاوة)

الحاج عشاوى : أهلا أهلا خطوة عزيزة (يحتضن المستشار أولا يعدها الحاج حمزة) أتفضلوا (وأشار الى كنية منجدة تسع شخصين بالقرب من المكتب) ياد النور ياد النور

(موجهها كلامه الى المستشار) عاش من شافك

المستشار : الله يبارك فيك يا حاج (يجلس الجميع)

الحاج عشاوى : (للحاج حمزة) خطوة عزيزة يا حاج

الحاج حمزة : الله يعز مقدارك يا حاج عشاوى

الحاج عشاوى : (ينادى) بحيرى [يدخل بحيرى]

بحيرى : نعم يا حاج

الحاج عشاوى : شوف طلبات الباشا والحاج يشربوا ايه

المستشار : لمون

الحج حمزة : قهوة سادة

الحاج عشاوى : قد ايه الواحد لغاية دلوقت متأثر لوفاة المرحوم محمود خصوصا الانتخابات قربت

المستشار : واللى أثر فينا أكثر إنه كان ناوى يترشح فى الانتخابات

الحاج حمزة : خصوصا انه كام ناوى يدخل تحدى ضد الحاج فتحى العماوى

الحاج عشاوى : بصراحة كان إنسان خدوم قد ايه خدم ناس (صمت للحظة)

الله يرحمة

[يدخل زبون بجلباب بلدى كالعادة]

الزبون : سلام عليكم

الجميع : وعليكم السلام ورحمة الله

الزبون : (يسلم على الجميع)

الحاج عشاوى : أفضّل

الزبون : الله يزيد فضلك يا حاج عموما عايزين طلبية مستعجلة

الحاج عشاوى : أفضّل عند الاستاذ سعيد (وبشير تجاهه) يا سعيد شوف طلبات الحاج درويش

[يعاود الثلاثة حديثهم]

الحاج عشاوى : لكن مافكرتوش إن حد ياخذ مكانه فى العيلة خصوصا إن لكم سمعة طيبة فى

الانتخابات

المستشار: فكرنا والله يا حاج ، ورابع يوم العزه عملنا اجتماع فى العيلة أخترنا اسمين تلاته ، بس

للأسف مفيش واحد رضى يترشح

الحاج عشاوى : (بتعجب) معقول طب ايه المانع

الحاج حمزة : حنقول ايه يا حاج ، كل واحد يطلعك بحجه شكل

[يدخل صبي القهوة يحمل الطلبات ، ومن ناحية أخرى بدأ الحمالون فى حمل البضاعة المطلوبة

للزبون إياه]

الحاج عشاوى : (وهو يقدم القهوة للحاج حمزة ، والليمون للمستشار)

طب انتة يا حاج حمزة ، ولاقولك بلاش انتة ، الباشا ماهو قدها وقدود

المستشار : بالنسبة لي يا حاج عشان ادخل الانتخابات ، لازم اسيب الوظيفة والحاج حمزة مش عايز

مصالحة تتعطل ، ما انت عارف هو بيباشر مصالحه بنفسه وفى سفر دايم

الحاج حمزة : (بعد ان اخرج نفسا طويلا من منخريه وارثشف قليلا من القهوة) عشان كده إحنا

جيناك

الحاج عشاوى : (وهو يتناول مبسم الخرطوم من الحاج حمزة ، ويسمع الكلمة الاخيرة اذ به ينتفض

واقفا) قلت إيه يا حاج حمزة

الحاج حمزة : بقولك جيناك عشان نكلمك فى حكاية الانتخابات

الحاج عشاوى : طب وهى دى فيها كلام ، حد فى العيلة عندكم اترشح واتخلينا عنه فى الانتخابات ،

ما انت عارف المرحوم اترشح مرتين تلاته والحمد لله وقفنا معاه

الحاج حمزة : مش المقصود يا حاج عشاوى ، طول عمرك شهم وموجود ساعة العوزة

الحاج عشاوى : أمال ايه المقصد

المستشار : المقصد يا حاج ، ان احنا اتفقنا إنك انت اللى تترشح فى الانتخابات مكان المرحوم محمود

الحاج عشاوى : (فى تعجب) أنى اللى اترشح مكان المرحوم محمد العبادى، لالا ، قول كلام غير ده ياباشا

المستشار : وإيه المانع يا حاج عشاوى ، انت رصيدك فى الدايره كبير أوى

الحاج عشاوى : رصيد إيه يباشا ، كل ما هنالك عمارة أربع طوابق مش عارف أشطبها

المستشار : يا حاج مش نقصد رصيدك فى البنوك ، المقصود حب الناس واحترامهم لك ، وده لأنك سباق دايمًا فى خدمة الناس ومساعدتهم

الحاج عشاوى : (تترتاح أساريره للكلام الأخير) أه إذا كان كده الحمد لله ، وعموما انا عمرى مافكرت بعملى ده إنى ادخل انتخابات ، أو غيره ولكن لوجه الله

الحاج حمزة : وأهو عشان كده يا حاج الناس بتحبك لله فى الله ، ومتنساش لو دخلت البرلمان حتقدر تخدم الناس أكثر

المستشار : واحنا حنقف معاك بكل طاقتنا ، وخلقى عنك إجراءات الترشيح والدعاية

الحاج عشاوى : سيبونا بقى من حكاية الطيبة والاجراءات والدعاية ، وخلقو البساط أحمدى دورتوا فى دفاتركم ليه أنى بالذات

المستشار : شوف بقى يا حاج ، انت بتحب الصراحة وبصراحة الامر، علشان ان عائلة العشاوى حد منهم يدخل البرلمان بعد السنة دى ، ده من رابع المستحيلات وبصراحة احنا مش محبوبين فى الناس زى المرحوم محمود (فى تلك الاثناء كان العمال قد انتهوا من حمل البضاعة وبدأوا يتلصصون السمع بين الاشولة) وبصراحة كمان الحاج حمزة ، هو اللى شار علينا لترشيحك مكان المرحوم ، عشان يعرف كويس قد ايه انت محبوب من الناس ، وكل افراد العيلة موافقين على كده

الحاج عشاوى : من ناحية حب الناس ليا ده فضل من الله ، ومن ناحية اختياركم انا عمرى ما فكرت فى الموضوع ده ، ده عايز الناس القادرة ، الحاجة دى لعبتهم

المستشار : لا يا حاج مايغركش الحكاية دى ، عايزة جرة وقلب جامد

الحاج عشاوى : يا سليم باشا متنساش الموضوع ده ، عايز الواحد المتعلم ومش اى تعليم ، ولازم يكون فاهم قوانين . يعنى زى حالاتك اما أنى (يقوم عن كرسيه لا يعم بلاش

كسوف)

المستشار : ليه يا حاج انت مش بتعرف تقرأ وتكتب

الحاج عشاوى : يعنى يدوبك لزوم الشغل

المستشار : كل المطلوب شهادة محو الامية

الحاج عشاوى : (بتعجب) محو الامية !!! دانا معايا الابتدائية ، بس موت ابويا الله يرحمه ما
خلانيش اكمل

المستشار : عز الطلب وبعدين ما يغركش يا حاج ، دا تلات اربعم امى

الحاج عشاوى : يسلام يا سليم باشا اتكلم كلام غير ده

المستشار : شوف يا حاج ، الأمية دى على قسمين قسم ماحى (وأشار بيده اشارة مسح على المكتب)

لا قراية ولا كتابة ، ودول معروفين زى الشمس ، بس على ما يصدر قرار طعن فى سلامة عضويتهم ،
ويتعرض على المجلس، و الحاج سيد قراره بيت فيه ،تكون الدورة انتهت وايه ! وبيعملوا دعاية

للدورة الثانية ، آه ! ما هى وراثه حكومية والدليل على كده الحاج فتحى العماوى

الحاج عشاوى : يكون مين الحاج سيد قرارة ؟

المستشار : ماتخدش فى بالك ، دول جماعة ولاد عم كبيرهم الحاج سيد ، اما الجماعة الباقيين دول

يقروا ويكتبوا حلوقوى ، بس اميتهم امية ثقافية ، يعنى زى ماقلت انت لا يعرفوا قوانين ولا يعرفوا

يعبروا عن مطالب أهالى دايرتهم ، ولا يشوفوهم إلا عند الانتخابات ، لكن أنى معاك دول شاطرين لما
يعبروا عن مطالبهم ومصالحهم الخاصة

(صمت قليل) بلاش ده كله ، الواحد فيهم ما بيحضرش غير مرتين ، مرة عند افتتاح الرئيس للدورة

الجديدة ، ومرة عند اختتامها

الحاج عشاوى : ايش معنى مرتين

المستشار : عشان يسقف ، وخذ عندك خمس سنين نوم

الحاج عشاوى : ياباشا اتكلم كلام غير ده ، طب امتى يصحى

المستشار : اما يكون فيه قانون يمر فى الضلمه ، ورئيس المجلس يسأل مين موافق ، وهنا يصحى
ويرفع ايديه الاتنين

الحاج عشاوى : طب إزاي رئيس المجلس حيشوف اللى رافع ايده فى الضلمه

المستشار : اصل دول بالذات اللى بيتميزوا عن الشعب المصرى ، عندهم الحاسة السادسة

الحاج عشاوى : (فى سذاجه) وبعدين يا باشا ، يعنى هو حرام الواحد فيهم ياخذ تعسيلة ، ، ما هم
بيسهروا على راحة الجماهير

المستشار : الله ينور عليك ، أهو انت يا حاج جبت الفائدة ، طب مرة واحد عضوا سهران على مطالب مراته ، هي مثقفة آوى وهو مابيعرفش يقرأ لقاها الصبح بتجهز اوراق وتحطها فى الشنطة ، سألها اوراق ايه دى ، قالت دى شكاوى من اهل الدايرة عشان المشكلة الفلانية ، وعليها امضاءاتهم ، قالها ، طب متنسيش تحطى جلابية النوم (يضحك ثلاثتهم)

الحاج عشاوى : عشان كده يا باشا انا مش حابب ادخل فى الموضوع دهو عشان ميحصلش مشاكل **الحاج حمزة :** مشاكل ايه تانى

الحاج عشاوى : ماننا عارف يا حاج حمزة ، انا مشفش غلط واسكت عليه ، ولو حصل قلت كلمة كده او كده ، وعلى رأى قول الشاعر ، يحصل مالا تحمد عقباه

المستشار : الله ، طب ما تتكلم يا حاج طولك وعرضك هو احنا بنرشحك عشان إيه؟ تصقف ولا تنام ، بالعكس عشان تعبر عن مطالب الناس الغلابة ، وتعرض مشاكلهم لازم تلفت الانظار انك انسان له كيان له رأى

الحاج عشاوى : (وضع رأسه بين يديه وصمت الجميع للحظات)

طب ممكن افكر يومين

المستشار : من النحيادى أطمئن

[فجأة يخرج الحمالون من وسط الاشولة يهللون ويصيحون ويحتضنون الحاج عشاوى ويأتى الناس من الخارج يتساءلون ، فيسرى الخبر بين الجميع ويعلن واحد ، ان مشاريب الناس من القهوة على حسابه ، وينسل المستشار سليم والحاج حمزة خارجا ، بعد مباركتهم الترشيح للحاج عشاوى ، وبعد ان تخلوا خشبة المسرح من الناس ينادى الحاج عشاوى على بحيرى

بحيرى : ايوه ياسيد الناس

الحاج عشاوى : بينا على زعبله

المنظر الثانى

يفتح الستار

عن شادر تزيينه الرسومات والالوان وعلى جانبيه مقاعد مكتظة بالجالسين ، يتصدر القاعة ثلاثة من الكراسى الشاغرة بعد، تعلوها لافتة قماشية عريضة مكتوب أعلاها بخط رفيع [بسم الله الرحمن الرحيم] وأسفل منها وبنفس الخط الرفيع (وما النصر الا من عند الله) ثم يتلوه وبخط عريض [رابطة التجار وأصحاب المهن الحرة تؤيد الحاج عشاوى أمين] وبخط عريض [رجل المبادئ والنزاهة والشرف رمز المفتاح] ومرسوم مفتاح علامة الرمز ، فجأة صياح وتهليل ينبئ عند قدوم الحاج عشاوى الذى يظهر بالفعل مع المستشار سليم والحاج حمزة ويتخذون مقاعدهم ، يشير الحاج عشاوى نحو الجمهور (الذى يمثله بالطبع جمهور المسرح بالتحية) وهو فى أحسن حلة بعباءته السوداء وعمامته البيضاء ثم يتوسط الاخوين سليم باشا والحاج حمزة ، يقرب أحدهم سماعة الميكروفون الى سليم باشا الذى مال نحو الحاج عشاوى ليلقى فى أذنه بعض الكلمات .

ما زال الجمهور يثير اللغط والصخب ويرددون حبيبيكم مين ، عشاوى أمين

سليم باشا : (بعد أن يعتدل فى جلسته) بسم الله الرحمن الرحيم (يسود الهدوء بعض الشئ) والصلاة والسلام على من لا نبي بعده ، السادة الكرام يشرفنا حضوركم ويسعدنا لقاءكم ، غنى عن التعريف رجل عرفناه بشهامته وكرمه البالغ وطيبته وحضوره الخير دائما وقوله الحق ولو كان مرا وبذله وعطائه ولو كان آخر ما يملك ، له أياد بيضاء على المحتاجين والفقراء والمرضى ، الصغير يعرفه قبل الكبير ، إنه ابن الدائرة الحاج عشاوى أمين (ما يكاد يذكر الاسم حتى تردد التهاتفات و حبيبيكم مين عشاوى امين ثلاث أو أربع مرات ، والحاج يلوح بالشكر والامتنان للجمهور) (مواصلا) ولا يفعل هذا الا ابتغاء مرضاة الله وحب الناس ، لذا فهو يطلب منكم ان تمنحوه ثقتكم الغالية والادلاء بأصواتكم لمساندته فى الانتخابات ، ولا أطيل عليكم وسأترك له الميكروفون ليرد على تساؤلاتكم (تصفيق)]

ما كاد الحاج عشاوى يمسك بسماعة الميكروفون حتى بدأت التهاتفات [وحبيبيكم مين ، عشاوى امين (كذلك ثلاث او اربع مرات

الحاج عشاوى : (يرد على هتافاتهم بأشارة من يده ، ثم مال نحو المستشار) صحيح اللى انا شايفة ده

سليم باشا : شايف ايه

الحاج عشاوى : الناس اللى قدامى شكلهم محترم قوى قوى معقول يكونوا أهل الدائرة ؟

سليم باشا : امال يعنى مستوردينهم

[الحوار سرى بين الحاج عشاوى وسليم باشا وبالطبع مسموع للجمهور المشاهد ، غير الجمهور المشارك بالطبع فى الاحداث]

الحاج عشاوى : (بعد ان امسك بسماعة المايكروفون)

أتوجه بالشكر لسليم باشا على كلمته ، وان كنت لا احب المدح او الثناء لشخصى حتى لا يضيع ثوابنا عند الله ، واللى احب أضيفه انى لا املك مشاريع ولا ارصده فى البنوك زى كثير فاهمين غلط عنى ، واصلا حتى لو نجحت فى الانتخابات ودخلت مجلس الشعب بحاول بقدر امكانياتى اخدم اهل الدائرة واللى عيز يسأل عن حاجة انا مستعد .

(ما كاد ينتهى من جملته الاخيرة)

الجمهور : وحببيكم مين عشاوى امين

(ثلاث او اربع مرات)

واحد من الجمهور : يعنى يا حاج لما تدخل مجلس الشعب مش حتنسى وعودك زى ناس راحوا قبلك ونفس الكلام اللى انت قلته

الحاج عشاوى : (وهو يمسح عرقه بمنديل يد) يراجل قول كلام غير ده طب ازاي وشى لما ارجع تانى البلد

ثان من الجمهور : (يمسك بورقة وقلم) ايه رأى الحاج فى التطور الاخير لمراحل التعليم وخاصة الابتدائية ؟

الحاج عشاوى : (بعد ان بلع ريقه بصعوبة ونظر عن يمينه بحيث يجلس سليم باشا)
صحفى ده ولا ايه

سليم باشا : (يقوم منفعل) بعد اذنك يا حاج (واخذ الميكروفون موجهها كلامه للسائل) روح للى باعتينك قلمهم اما بيا الحاج عشاوى وزير تعليم ساعتها اسألوه .

الحاج عشاوى : (موجهها كلامه لسليم باشا) طب عندى فكرة ممكن ارد عليه

سليم باشا : اصل الناس دى انا فاهمها كويس دول عايزين يحر جوك وسط الجمهور

الحاج عشاوى : طب بعد اذنك (وأخذ السماعه من سليم باشا) شوف يا استاذ ، انا لى ابن بنتى فى سنة خامسه ابتدائى له سنتين بيعيد فيها ، السنة الاولى سقط فى جميع المواد ما عدا الانجليزى ، ابوه قال يمكن يكون له عقلية مواليه للغرب ، السنه التانيه نجح فى جميع المواد ما عدا الانجليزى ، وخطه حلو قوى ينقل الكتاب مسطرة ، بس ما يعرفش يقرأ ولا كلمه ايه رأيك بقى ؟ رغم الدروس الخصوصية

الجمهور : وحببيكم مين ، عشاوى أمين

ثالث من الجمهور : (رجل فلاح بسيط) يا حاج كله كوم والدروس الخصوصية كوم خربت بيوتنا ، كده وألا الولاد يسقطوا ، وياريت بفايدة ، ليا ابن فى الاعدادية قلت له أكتب أسمى على كيس القطن عشان يروح المجمع ، انا أسمى محمود فضل الله ، كتب هو حسام حسن

واحد من الجمهور : (يهتف) وحببيكم مين ؟

[قبل ان يرد عليه الجمهور رد الحاج]

الحاج عشاوى : يا أخى أتهيب و اقعد ، هو احنا فى الاتحاد الاشتراكى ؟

[فى تلك اللحظات كان هناك رجل عجوز يحاول شق طريقه محاولا الوصول لخشبة المسرح وبعض الناس يحاول أثناءه عن الوصول]

العجوز : (وهو يشق طريقه بالعصى) (هو فين الحاج عشاوى) ؟

بعض الناس : رايح فين يا عم الحاج ؟ خليك مكانك

الحاج عشاوى : (يلاحظ ما يجرى) سيبوه تعالى يا عم الحاج (ويقوم بنفسه يأخذ بيده) هاتو كرسى (ثم يجلسه على الكرسى) أفضّل يا عم الحاج عايز تقول حاجة ؟

العجوز : (وقد بدت هيأته تدل على وضاعة حاله من ناحية الملابس وجسده النحيل ويده التى ترتعش وهى مطبقة على العصى) لا مؤخدة يابنى هو فين الحاج عشاوى

الحاج عشاوى : (ف استغرب) انا يعم الحاج ، انا الحاج ، انا عشاوى

العجوز : والنبي صحيح (وحاول العجوز الوقوف والحاج عشاوى لم يتح له ذلك)

الحاج عشاوى : زى مانت يا عم الحاج

العجوز : متأخذنيش يا حاج عشاوى اصل نظرى مش مساعدنى

الحاج عشاوى : بس ما قولتش اسمك ايه يا عم الحاج

العجوز : مش سامع بتقول ايه ؟

الحاج عشاوى : (يقترب من أذنه) اسمك أيه ؟

العجوز : آه ، اسمى عبد العزيز بس بينادولى يا زيزو

الحاج عشاوى : (ف أستغرب) زيزو؟ عايز تقول حاجه يعم عبد العزيز

العجوز : بينادولى يا زيزو

الحاج عشاوى : معقول يا عم زيزو وعموما زيزو زيزو ، عايز تقول حاجة

العجوز : ابوه يا حاج زى مانت شايف العمر مفضلش فيه قد اللي راح وعندى الضغط والسكر ، المعاش اللي باخده حاجه بسيطه يعنى مايكملش حق حقته موصوفة، لى وقاعد مع ابني اللي مخلف أورطة عيال وكلهم فى المدارس وهو على باب الله ، مرة يكمل من معاه على المعاش يجيب الحقنة ومرة يكمل بالمعاش يسدد اللي عليه ، مانت عارف مصاريف الولاد والدروس الخصوصية ، وهو يرضينى بكلمة تطيب خاطرى (ويبدأ العجوز فى السعال الخفيف الذى سرعان ما تزداد وطأته عليه فيخرج مندبلا من فتحة جلابه ملئ بالبساق المتحجر ، مما يثير النفوس من حوله وخاصة حينما يبسق فيه) لامؤاخذة يا حاج تقول ايه فى الدخان !!! [وفى تلك الاثناء بدأت بعض الهمهمات والاصوات اللتى تحت الرجل العجوز على الانتهاء من حديثه وسعاله]

الحاج عشاوى : (موجهها حديثه الى الجمهور خلوه يخلص على مهله ، أنى معاكم مش مستعجل واللى عنده سؤال ح يسأله) [يخرج العجوز من فتحة جلابه الثانية باكوا دخان شعر ودفتر بفرة ، ثم يشرع فى لف سيجارة وهو يضع الدخان ف الوريقة يفردده ثم بيرمها ، كانت يده ترتعش ولكن كم هى خبيرة فى صنع اللفافة]

العجوز : لا مؤاخذة يا حاج مابشربش غير لف أعملك واحدة ؟

الحاج عشاوى : (فى تعجب هو ومن حوله) لا شكرا يا عم عبد العزيز

العجوز : بينادولى يا زيزو

الحاج عشاوى : ابوة يا زيزو

الحاج حمزة : (يخرج من جيبه علبة سجائر ثم أخرج منها سيجارة وقدمها للعجوز) أتفضل يا عم زيزو

العجوز : لا يا بنى الله ي حفظك أنى بشرب لف ، علشان خفيف على صدرى . بس معاك ولعة !

الحاج حمزة : آه (ثم أخرج قداحة ذاتية الاشتعال ثم اشعل له لفاقته)

العجوز : شكرا (رافعا يده كعادة المدخنين وواصل حديثه) انا بقول يا حاج لمل ربنا يكرمك ، وتدخل

البرلمان دول اتنين وعشيرين مالطوش . يا ريت تكلم لنا ام العواجز يمكن تلحلهم شوية

الحاج عشاوى : شاى لله يام العواجز (لكن الحاج عشاوى يفتن بسرعة) مين أم العواجز يا عم

زيزو ؟

سليم باشا: (ضاحكا) ماتخدش فى بالك يا حاج ، يقصد وزيرة التأمينات والشؤون الاجتماعية
الحاج عشاوى : (فى غيظ) يا عنى يا عم زيزو شا يفنى قاعد على باب السيدة (ثم نادى على سعيد
المحاسب) يا سعيد

المحاسب : حاضر يا حاج انا معاك

[يقترب من المنصة شاب ويخرج ورقة من جيبه]

الشاب : نيابة عن شباب قرية صراوة التابعة لبندر الدائرة ، بعد أذن الحاج عشاوى أذكر له بعض من
أحوال هذه القرية المنسية من على خريطة الدولة ، إن لم يكن المركز ذاته التابعة له قرية تعدادها
عشرة آلاف ، لا أنكر ان فيها مياه وكهرباء ولكن فى انقطاع دائم والطريق التى تربطها بالمركز
ترايبية . وإذ أوجه غالدعوة لكم لزيارتنا فى ايام الشتاء حتى لا تقدروا على الوصول الينا . ونكون فى
معزل عن العالم الداخلى والخارجى . القرية بها مدرسة ابتدائية كانت منذ عهد غابر أصطبلا للخيل
ورغم قدمها العتيق ، فما زالت تواصل حنوها وعطفها على اطفال فى عمر الزهور . فلا تريد ان
تنهدم عليهم حتى الآن . من يصدق لا يوجد بها خط تليفون او وحدة صحية ، ولا يوجد بها مركز شباب
رياضة من خلال انشطته المتعددة على الاقل يمتص بعض من تلك الطاقات المهجرة . حتى تحول ذلك
الشباب بأبداعاته المختلفة نحو عمليات سرقة من النوع الخفيف . وهذا مثال . ما رأى الحاج فى
بعضهم ، يلف حول رأسه حزمة من البرسيم ويقدمها نحو فتحة بيت الأرنب حتى اذا ماقتربوا من
رأسه أمسك بها واحد تلو الآخر . نعم يا حاج هذا حال بعض شبابنا الذى لو لقى اهتمام من قبل
حكومتنا العتيقة لكان بإمكانه ان يقدم براءات اختراع ، ولكن كل من سبقوك الى عضوية مجلس
الشعب عن تلك الدائرة ، صبوا جل اهتمامهم على خدمة أنفسهم وزويهم فقط ، أنا أذكرك باحدهم الذى
يملك أكبر مزرعة حيوان للتسمين . وكان ذلك منذ سنين مضت . حينما كان ينقل الى مزرعته
الاعلاف المدعمة من قبل الدولة ايام ذاك على عربات نقل ثقيل وذلك أثناء الليل . وكان يأمر بأنزال
سكينة محول الكهرباء فتتطفئ الانوار . حتى لا يلاحظ أحد من أهل القرية ما يفعل . كنا نتمنى فقط لو
ساعد على رصف ذلك الطريق الترابى ، ولكن يوم مات هذا الرجل شيعة الكثير من نواب المجلس .
ولم يشيعة أحد من لقرية سوى انهم اتبعوة الكره واللعنات. ترى يا حاج هل تود ان تكون مثله او يكون
على يديك التغيير فتتال الحب والدعوات (تصفيق من الجمهور وتظهر على وجه الحاج عشاوى
تأثيرات ذلك عليه وكأن هموم الدنيا صبت على رأسه)

الحاج عشاوى : (يميل نحو سليم باشا) روح منك الله يا سليم باشا هي وقعة مهيبة وانت السبب ، أرد
واقول ايه

سليم باشا : بعد أذنك يا حاج (موجهها حديثه نحو الجمهور) شوفوا يا أخونا . فى بداية كلامى قلت ان
الحاج عشاوى يختلف تماما والكل يعرف كده كويس

واحد من الجمهور : (منفلا) والله كلكم زى بعض . أحمد زى از دحمد وكل واحد يجى يقول البقين
دول وبعد كده يخلع . ياما مرات سمعنا الكلام ده

الحاج عشاوى : (منفلا) طب يا سيدى خليها مرة من ضمن المرات وجربوا . على الطلاق من
بيتى الوظيفة دى ماتلزمنى والكل يعرف كده

سليم باشا : (يهدئ من روع الحاج) خبر ايه يا حاج واحد زى ده يخليك تنفعل

الحاج عشاوى : عليا الطلاق كمان مرة يا شيخ مش البرلمان الوزارة نفسها ماتلزمنى . ولولا الناس
المحترمين ماكنت داخل الانتخابات

سليم باشا : يا حاج .. يا حاج ، هو ده اسمه كلام أمال فى البرلمان . حاتعمل ايه . يا راجل هيه من
اولها ح تعمل كده

الحاج عشاوى : لا يا سليم باشا كل حاجة ليها حدود . كثير من الناس بتفكر أننى من أياهم ()
وأشار بيده على فمه بمعنى الاكل الحرام)

الجمهور : وحببيكم مين . عشاوى امين وحببيكم مين . عشاوى امين

سليم باشا : سامع صدقنى الناس بتحبك يا حاج ، بس معزورين ياما الناس اللى قبلك كثير وعدوهم
ولما نجحوا محدش شاف وجوهم بعد كده . وبعدين لازم روحك تكون طويلة

[كان الجمهور مازال يواصل هتافاته للحاج عشاوى لما رأوا حالة الغضب اللتى انتابته . حتى اشار
اليه انه الان كويس]

(فى تلك اللحظة تندفع امرأة فى العقد الثالث من عمرها ترتدى زى أسود ينبئ عن حالة حداد تعيشها)

المرأة : (وهى تكاد ترتدى على قدمى الحاج عشاوى) فى عرضك يا حاج

[الحاضرون فى زهول]

الحاج عشاوى : (فى زهول) إيه يا ست فى ايه ؟

المرأة : (فى رجاء) أبنى يا حاج ربنا ما يوجعك فى ضنى (نحو سليم باشا) أبنى ياسليم باشا (فى توسل) أبنى يا ناس [فى أشفاق ينظر اليها الحاضرون]

الحاج عشاوى : ماله ابنك يا ست. تايه . مريض

المرأة : يا ريت ما كنش ده حالي (فى بكاء) سنتين وانا ادور عليه فى السجون كعب داير . لا حس ولا خبر (ينظرون الى بعضهم البعض سليم باشا ، الحاج عشاوى ، الحاج حمزة ، والحاضرون) أحد المقربين : (يتجه نحو الرجل العجوز الملقب بزيرو والذي ما زال جالسا عن قرب هامسا فى أذنه) مش تهوينا بقى يا عم زيرو (ينظر اليه العجوز فى تعجب وهو يلف سجارة) أظن ما غلطتش العجوز : بتقول ايه الناس بينادولى يازيرو

الحاج عشاوى : (يلاحظ ما يجرى) يا أخى عيب عليك عايز تقوم راجل قد ابوك وتاخذ منه الكرسي

[يأتى بكرسى ثم يفسح الحاج عشاوى مكان للمرأة تجلس فيه]

الحاج عشاوى : ايوا يا ست ابنك ماله ؟

المرأة : ليلة ما انسهاش . كان قايم يتوضئ عشان يصلى الفجر . خبطوا علينا ، فتح لهم الباب . انت فلان ؟ قال أنى فلان . فتنشوا البيت حته حته فى الآخر قالوا اتفضل معانا . صرخت فيهم . هو فيه إيه . مفيش فايده ، وهم سحبينه . نادى على . راجع ياما ان شاء الله . أوعى تقطعى الصلاة ياما (مسترسلة) كان رجلى من بعد موت أبوه ، وهو اللى بيصرف على البيت خواته وانى كان مجهز لاخته المخطوبة حتى خطيبها لما علم بالقبض عليه ، راح ولا رجعش

سليم باشا : ابنك بيشتغل ايه يا ست

المرأة : (وهى تمسح دموعها) بيشتغل نجار . كان على عيني لما طلع من المدرسة كان ما باليد حيلة اتحمل المسؤولية وهو لسة صغير ، ورغم كده عمر العيبة ما طلعت منه . عايزه اعرف هو عمل ايه . من شغله للبيت وان كترت للجامع

سليم باشا : يهز رأسه آه اه للجامع (وكمن ادرك شئ) قولى ياست هو كان مربى لحيه

المرأة : (فى تعجب) لحيه ، يعنى ايه لحيه (فى سذاجة تواصل) أنى يا سليم باشا اللى بربى
سليم باشا : (فى استفهام مشوب بالسخرية) بتربى ايه يا ست ؟
المرأة : يعز مقدارك بربى طيور من مجاميعها ، فراخ و بط ووز
الحاج عشاوى :ياست ياست.....

المرأة : حسنية يا حاج

الحاج عشاوى : ياست حسنية الباشا كان يقصد مربى دقنه ؟

المرأة : إيوة فهمت هى دقنه زى ماتقول كانت خفيفة يعنى كان فيها يجى خمستاشر شعرايه
الحاج عشاوى : يا سعيد (مناديا)

سعيد المحاسب : معاك يا حاج

الحاج عشاوى : سجل اسم الست وابنها

المرأة : ياريت يا حاج يرحمونى من العذاب اللى عايشاه كل ساعة (متوجه نحو الجمهور) حاجه
واحدة بس اعرفها ، هو حى ولا ميت

[وبينما الستار يقفل إذ بأحد الجمهور ينادى يا حاج يا حاج]

(وبعد قليل يفتح الستار بعد ما يخلوا المسرح تماما ويسمع صوت)

_حسب أوامر صادرة من الامن العام ينتهى هذا الاجتماع حالا _

ثم يقفل الستار

الفصل الثانى

(المنظر الاول)

[صالون عريض مفروش بالموكيت ، وبه عدد من المقاعد الفخمة التنجيد ، يتوسط القاعة ترابيزة كبيرة ، فى زاويتى الصالون أنيتين زرع وآوانى زهور مصطفه جانبا ، معلق على الحائط بعض الصور الكبيرة الاحجام للحاج فتحى العماوى ، مرة وهو يسلم على رئيس مجلس الشعب ومرة وهو فى وسط القاعة امام المايكروفون وهو يبتسم ناهيك ، عن تلك الصور الطبيعية الكبيرة الحجم لجثته الثمينة التى تلفها عبائة وهو فيها اصلع الرأس ، كتب تحتها بخط ثلث جميل ، الحاج فتحى العماوى عضوا مجلس الشعب (بينما كان الحاج فتحى يتحدث فى التليفون وهو مضجع على احد المقاعد ، دخل عليه اثنان فى حالة فزع ، يرتديان زى فلاح معتاد)

الاول : يا حاج يا حاج الدنيا مقلوبة فى المركز وانت معندكش خبر

الحاج فتحى : (بهدوء) إيه جات قوة من المحافظه اخدت صناديق الانتخابات ، طب ودى فيها إيه

الثانى : يعنى عندك علم

الحاج فتحى : أقعد انت وهو (مواصلا) ماهى الاخبار لسة وصلانى من شوية !

الاول : (وهو يتخذ مقعد) بس اللى ما تعرفوش يا حاج ان ضرب النار اشتغل بين الامن والاهالى (فى لهجة مشوية بالغضب) مات تلاته يا حاج ده غير اللى انصاب

الحاج فتحى : وليه ده يحصل من اصله ؟

الثانى : الاهالى تو ما عرفوا ان القوة جاية تاخذ الصناديق ، طلعت اشاعة لو الصناديق راحت للمحافظة حيحصل تزوير . وعليها عائلة العبادى والاهالى من العزب والكفور سدوا الطريق عليهم ، من هنا لهذا القوة فتحت عليهم النار

الحاج فتحى : (فى هدوء) وبعدين

الثانى : ولا قبلين فيه اللى بيقول مات تلاته واللى بيقول مات خمسة الخيبة الكبيرة . لما نقلوا المتصابين للمستشفى مالىوش دكاترة كسروا عربيات الاسعاف ، ودخلوا غرف العمليات وبهدلوا الدنيا زى ماتقول كده

الحاج فتحي : فى حد هناك من جماعة العبادى الكبار ؟

الثانى : كان الحاج حمزة معاه الحاج عشاوى بنفسه ، وبصراحة الراجل لما لقي العملية زادت عن حدها ، بقى يحوش فى الناس ويبعد فيهم . ياناس ابعده . ياناس بلاش كده . ياناس حرام . عشان ايه ده كله ، بقى عامل زى المجنون

الحاج فتحي : اللى باستغربلوا الناس دى عايزة ايه . العيلة دى بتحاربني ليه . الانتخابات اللى فاتت كسحت اخوهم محمود . ومات بحسرتة ، المرة دى جايين واحد لا من العيلة ولا حتى يقربلهم ومين عشاوى الخردواتى المزيث . واللى باستغربلة اكثر الراجل ده من بيته لمحلته عمره ما كان بتاع انتخابات . معقول هما اللى ضغطوا عليه . اشمعنى هو بالذات ؟

الاول : انا اقولك يا حاج . سليم باشا عرف يحسبها صح الراجل ده واخذ سمعة طيبة قوى بين الناس . وهو بصراحة محضره دايمًا خير . اى مشكلة تقع بين عيلتين ولا بين جماعة و جماعة ولا حتى بين واحد ومراته . يصلح بينهم . ده غير انه ربنا فاتحها عليه ، وعشان كده بيعمل خير ياما قوى . ده غير اللى عايشين من وراه . عشان كده سليم باشا اختار الراجل ده . ان نجح يبقى كده ضربك بيه . وان سقط يبقى كده ماخسرش حاجة

الحاج فتحي : طب ما انى عارف ان سليم بيعمل كده ليه ؟ بيضربني بالراجل ده ، بس اللى باستغربله الناس بتحب الراجل ده ليه ؟ اذا كان بيعمل خير طب مانى ياما عملت خير . يعنى وانا فى المجلس كل يوم ناس جايه من المركز واللى من العزب والكفور .

اللى عنده ابن معاه دبلوم وعايز يوظفه . واللى عايز يدخل ابنه كلية الشرطة . واللى عايز يتوظف فى الاوقاف فراش ولا مؤذن رغم انه مش حافظ الاذان . عندك كمان جامع البلد بقى تبع الاوقاف . كل ده مش خير وقفنا فيه

الثانى : والله كلامك صح (فى لهجة مشوبة بالسخرية) وهو اللى بيتوظف بيتوظف ببلاش . لازم على الاقل (يحرك يده من اسفل) هه . يدفع ثلاث بواكى . على ايدك بعث الجاموسة اللى مشارك عليها عشان اتوظف فراش فى الجامع بستين سبعين جنيه

الحاج فتحي : طب وفيها ايه انت كده ضمنت مستقبلك

الثانى : على رأيك ضمنت خمسه ست كيلوا سكر وسبع بواكى شاي وازاتين زيت تموين الشهر

الحاج فتحى : وهو الفلاح عايز ايه اكثر من اللقمة اللي بيغمسها مش وكباية شاي وراها . ويتقرع

الاول : كأنك يا حاج بتتكر انك فلاح

الحاج فتحى : وهو أنى اتكلم الكلام ده وعارف كده اللي علشان انى فلاح ومتربى وسطيكم

الاول : يا خسارة جات متأخره . أنى ابن عمك وحقولها بصراحة فى وشك . اللي زيك ما وراهش غير خراب البيوت . ومايستهلش قطرة دم واحده تسيل علشانه . ولا علتين يقعوا مع بعض . ولا حتى من اصله اخطى عتبة البيت واحط له صوتى

الحاج فتحى : مالك انت زعلت يا زعزوعة

زعزوعة : لا . انا طول عمرى عارفك من زمان تحب المنظرة . بعث الخمس فدادين علشان تدخل البرلمان . ووقفنا معاك ولما نجحت فى الانتخابات . قد ايه كانت فرحتنا فى البلاد . وقد ايه كانت امالنا فيك . اى نعم وقعنا مع عيلة العبادى وحصل خصام . قلنا مع الايام ح يزول وبأمكانك تصلح المعوج . الناس اللي فى الارياف الغاطسانين فى البرك والوحد والطين كان بأمكانك تاخذ بايدهم طالما وثقوا فيك

الحاج فتحى : بس بس

زعزوعة : (فى نرفزة) لا مش بس (ينهض قائما) هى ليه الدولة عاملة برلمان . الدولة عمرها ما تعرف عن صراوة ولا شباس ولا اى عزبة . احنا منسيين (فى نرفزة اكثر) طول عمرنا منسيين **الحاج فتحى :** حيلك حيلك . هو احنا فى مجلس الشعب ح تخطب فينا ، يا زعزوعة ياخويا . اصل انت طيب وعلى نياتك . الدولة عارفة كل كبيرة وصغيرة . مثلا اما تلم زرعتك . لو ربنا كرمك بعد زرعة القطن بتلات اربع قناطير وتمسك فى ايدك الفين جنيه يروحوا فين

زعزوعة : والله انت فلاح وعارف . بعد خصم فلوس الرش والمقاولة والذى منه . ده غير الصراريف يهلوا عليك زى الناموس فى الصيف . يعنى حيثفضل حق كيلتين برسيم . اهوا البهيمة تلاقى تاكل **الحاج فتحى :** عشان كده تحمد ربنا اللي ما يشاركوا البهيمة فى اكلها (يصمت قليلا) انت تعرف الشيخ محمد ابو سنه

زعزوعة : ابوة باعرفه بس دا فى السجن

الحاج فتحى : تعرف ليه ؟

عشان قال على المنبر اتقى الله يا وزير الدخلية . بعدها فص ملح وداب . طب ايه اللي عرف وزير الدخلية فى مصر باللى قاله الشيخ فى صراوة . تعرف يا زعزوة الحكومة عارفة حيواناتك المنوية اللي بتنزّل كل كام ليلة وتعرف عددها كام زعزوة : طب وهى دى عايزة معرفة ما هم معروفين ، الحمارة وبنتها والمعزه وبنيتها . وكان عندى جاموسة شركه شيوخ الاوقاف خلصوا عليها

الثانى : لما الحكومة عارفة كل حاجة انتوا لازمتمكوا ايه ؟

الحاج فتحى : (يصمت قليلا) سؤال مش بطل بس حقربها لك يا سلامة . زى ما تقول منظر . وجهة . يعنى مثلا تعرف قانون الصحافة اللي صدر من سنتين سلامة : لا . ماعرفوش .

الحاج فتحى : ولا آنى . ولا غاية دلوقتى ماعرفش بينص على ايه . بلاش دى ، تعرف قانون حالة الطوارئ

زعزوة : بس دا الطوارئ دي شالوها من زمان . كانت بتيجى مع التموين فى نص الشهر

الحاج فتحى : يخرب عقلك يا زعزوة ، قاصدك الشاى والسكر والزيت اللي كان يجى مع التموين زمان . ابسط يا عم اهى موجودة . بس كل ما هنالك شالوها من وزارة التموين حاطوها فى وزارة الداخلية

[يرن جرس التليفون]

الحاج فتحى (يلتقط السماعه) ألوا مينالباشا ، أهلا أهلا (تزداد ابتسامته عرضا) طب وده اسمه كلام يا باشا انت تأمر والله ثلاث تلاف ل الف وميهلسة احنا فى أول الفرز الله يبشرك ماشى ماشى عموما انا على التليفونمين سليم العبادى طب وهوا ده يهز فيك شعرة يا باشا عموما انا واثق ان المزيت ده عشناوى مش واخذ غلوة ... البركة فى سيائك وانا على التليفونمع الف سلامة (موجهها كلامه نحو الاثنين) جهز نفسك انت وهو عشان ندبحوا ثلاث رؤوس عجول وتبقى ليلة ما حصلتش

زعزوة : يا عنى نقول مبروك

الحاج فتحى : شوية كده انا لغاية دى لوقت متقدم على عشاوى المزييت ، تفتكروا مين اللى قاعد هناك متابع الفرز

سلامة : انا سمعت منك اسم سليم العبادى

الحاج فتحى : ايوه سليم العبادى قد ايه انى مبسوط فيه ، وعلى عينه متقدم على عشاوى بتاعه كده تجيله حسرة ، (سكت قليلا) مش عارف الناس دى عايزين منى ايه

زعزوعة : بصحيح مش عارفين الناس دى عايزة منك ايه ، باب رزق وانفتحك ، عايزين يشاركوك فيه ليه ، طب ما الدولة مليانة وظائف انقح من كده ، عندك مثلا وزارة التموين الحاج عشاوى على الاقل تاجر كبير وابن كار ، يعرف كويس الايب البقالين والتجار ، كفاية بس شمه منه يعرف ان كانت اللحمة فاسدة ولا تصلح ، بلاش دى عندك وزارة الزراعة ، اهو اصله فلاح ، وقبل كده اتعاص فى الطين ، ولما لقي العملية مش جايبة همها باع الارض وطلق البلهارسية وطلع على البندر ، طب بالله لو انه وزير خارجية لعمل كم قعدة من القاعدات البلدى ، بين الاشقاء العرب وخلاهم سمن على عسل ، بلاش ده كله لو انه رئيس وزرا

الحاج فتحى : (يقاطعه فى حدة وفى شئ من السخرية) بس بس كان هايعمل ايه ، هايجبلك جاموسة خلص تاكل من وراها انت وعيالك ، حايبينيك أوضتين ودورة مياه ، بدل الخن اللى انت قاعد فيه ، ولا حتى يسبيك تبنى فى نص الفدان بتاعك اللى برة البلد حتى تشم النفس انت وعيالك (يصمت قليلا ثم يواصل) يخرب عقلك يا زعزوعة وا الاوضة اللى بنتام فيها انت وعيالك ، عتبتها على باب الزرييه (فى سخرية) أحلم على قدك يا زعزوعة يا خويا

سلامة : طب لما انت عارف كده ماخذتش بيد اخوك ليه ؟ هى الحكومة مش ناقصها غير زعزوعة مكفياها هموم . خصوصا لما ربنا كرمك ودخلت البرلمان ، ولا تو ما دخلت نسيت أهل بلدك اللى وصلوك ، بلاش اهل البلد ، اخوك زعزوعة ابن امك ، تنساه

الحاج فتحى : (يبتسم فى خذى) ومين قال انى نسيت انا كنت فاكر كل حاجة ، كنت شايل هموم كل واحد فى البلد دى ، لغاية اول يوم دخلت فيه البرلمان ، وشفت بشر غير البشر اللى كنت وسطياها ، اول يوم الافتتاح وخطب فيه الرئيس (وهو يسرح ببصره لأعلى) معرفش كان بيتكلم عن ايه ، لكن ساعتها افتكرت جامع بلدنا الكبير

ووجوه الناس اللى الفتها سنين كثير ، وجوه تعبانة وعيون غايرة (يمسك بكتف سلامة) فرق كبير يا سلامة بين ووجوه تعبانة ، ووجوه بتضحك مليانة بشر وسرور ، ناس مابتطلعش منهم العيبة ، بس ماعليهم الا يشاوروا باديهم ، إما بالتصفيق او بالرفع على الموافقة . واحيانا مايسلمش الامر يحصل تترقيع م اللى بالى بالك ، عشان كده كان لازم انسى مع مرور الايام ، كان لازم اسكت ، كان لازم اتكلم بايدى حاجة واحده اللى مانستهاش ، الخمس فدادين اللى بعتم عشان اوصل ، كان لازم اردهم وفقهم عشر فدادين وأحلى بيت ، غير ارض استلمتها ومستصلحه ، عشان كده حثبت بايدى وسنانى [يرن جرس التليفون] (يلتقط الحاج فتحى سماعة التليفون) ايوه يا باشا ايه الاخبار فرق مية صوت إزاي يا باشا بقى احنا نقول خطوة لقدام نرجع لورا يا باشا انا ما بعترفش بحكاية الفرز دى ، ثم ده اللى ماتفقناش عليه شوف يا باشا دول ميتين ألف دبور دا غير عربية الهانم الصغيره مليش فى المستشار زفت سليم ده ، بايدك تنهى الموضوع ده من بدرى ماشى عموما انا معاك اول بأول (يضع سماعة التليفون بنرفزه)

زعزوعة : هيه نجهز العجول ؟

الحاج فتحى : الكلب عايز يعملها فى

زعزوعة : نجهز الكلاب

الحاج فتحى : (فى ضيق ونرفزه) يا اخى غور من قدامى

[يدخل صبى فى سن السادسة]

الصبى : (وهو منطلق) بابا ، بابا

الحاج فتحى : ايوه ياروح بابا ، تعالى

الصبى : (يتفاجئ بوجود سلامة وزعزوعة ينظر اليهما شذرا) مين دول يا بابا

الحاج فتحى : (ينظر اليهما شذرا وكأنها أول مره) دا عمه (وأشار نحو زعزوعة) ودا عمه

سلامه (مشير ناحيته)

[يتأثر زعزوعة بما حصل من الحاج فاتحى]

الصبى : (يذهب نحو سلامة) أهلا عم سلامه (يذهب نحو زعزوعة) عمه مين يا بابا

الحاج فتحي : (يعطى ظهره للجميع) اسأله

زعزوعة : (موجهها كلامه للحاج فتحي) إيه مكسوف تقول عمه مين ، امال لو عرف انى اخوك من امك حتعمل ايه ! (يتنهذ) من يوم ما دخلت البرلمان بتاعكوا دا يا فتحي يا خويا ، وقعدت فى مصر وانت بقيت جاحد قوى

الحاج فتحي : (فى عصبية) إيه يا زعزوعة كل حاجة واخدها بحساسية ولو قتلته عمك زعزوعة وسألنى يعنى ايه زعزوعة يبقى ايه قولك ؟

زعزوعة : وهزعل ليه ، ماهى امك اللى سمتمتى

الصبى : (يذهب نحو ابوه) بابا . بابا ، يعنى إيه زعزوعة

الحاج فتحي : (فى قرف) يوه . اتفضل يا عم رد عليه انت

زعزوعة : طب وإيه يا عنى انا ها عرفه (ينادى على الصبى) تعالى يا حبيبي (يذهب اليه الصبى)
انت اسمك ايه ؟

الصبى : اسمى اشرف

زعزوعة : انت عايز تعرف يعنى ايه زعزوعة يا اشرف ؟

الصبى : اه يا عمو

زعزوعة : (أخذ الصبى فى حضنه وضمه اليه فى حنان ثم أوقفه بين يديه وهو ممسك بكتفه) مره واحد فلاح راكب حمارة وماشى على قناية الميه ، لقي جنب منها عود قصب صغير عطشان ، الفلاح نزل سقاه من القنايه ، تانى اسبوع فايت عليه لقاه كبير شوية ، الفلاح انبسط ونزل سقاه تانى ، كل اسبوع عود القصب كان يكبر يكبر ، وآخر مرة الفلاح قال لنفسه ، المرة اللى جايه اجيب معايه منجل وأقطع عود القصب ، وأهو أفرح بيه الولاد ويمصوه ، وراح تانى يوم جايب المنجل وراح يقطع عود القصب ، لقي حوليه عيدان صغيرة لسة طالعة ، زعازيع زى العيال الصغيرة حولين امها ، عود القصب لقي المنجل فى ايد الفلاح وجى عليه يقطعه (يسكت قليلا)

الصبى : (فى تلهف) إيه اللى حصل يا عم زعزوعة

زعزوعة : (فى تأثر) عود القصب اترجاه وقاله والنبي يا عم الحاج اصبر علي كم يوم ، بس أربى الزعازيع دى دول يتامى مالممش أب ، الفلاح قاله ، اما يكبروا ليهم رب ، وهب راح قطعه الصبى : (فى تأثر) يا حرام

زعزوعة : والزعازيع يا اشرف جمع زعزوعة ، وأنى كنت واحد من الزعازيع دى الصبى : (يجرى نحو ابوه) أيه رأيك يا بابا أول الحدوته دى لصحابى فى البرلمان الصغير ؟

زعزوعة : (فى دهشة) ف الآيه يا خويا ، هو فيه برلمان صغير تانى الصبى : (فى براءة) اه يا عمو

زعزوعة : غير البرلمان (يشير للحاج فتحى) الكبير الأولانى

الصبى : آآ يا عمو زعزوعة بابا فى البرلمان الكبير وأنى فى البرلمان الصغير

زعزوعة : (يهز رأسه فى سخرية) شفت يا عم سلامة الظاهر إن العمليه دى حتبقى وراثه (للحاج فتحى) طب ليه ما يخدونيش فى البرلمان الصغير ، جتنا نيلة فى حظنا الهباب الصبى : عمو زعزوعة عمو زعزوعة

زعزوعة : نعم يا اشرف باشا

الصبى : عايز عايز اركب حمار عشان أول شى حا ، شى حا

الحاج فتحى : هو دا وقته يا اشرف منين يجبلك حمار

زعزوعة : ولا يهملك يا حاج انا اعمل حمار (وفجأة ينبطح زعزوعة) على الارض ويرتكن على ركبتيه ورجليه ويمشى مثل الحمار (تعالى يا اشرف واركب) يذهب الطفل ليركب

الحاج فتحى : (فى شدة) عيب يا اشرف

الصبى : عايز اركب يا بابا (وفى صوت أميل الى البكاء) والنبي يا بابا

زعزوعة : (للحاج فتحى) انت مالك انت ، انت اللى حمار ولا أنى تعالى اركب يا اشرف

الصبى : (بعدما ينظر تجاه ابيه وكأنه تلمس الرضى من نظراته)

[يركب على ظهر زعزوعة وفي صوت واحد]

شى حا ، شى حا ، (ويدور به زعزوعة فى الصلاة)

[يرن التليفون]

الحاج فتحى : (فى تلهف يلتقط السماعه) أيوه يا باشا متقدم على اربع تلاف صوت وبقى

صندوق واحد لا دى مؤامره عملتها فى ، انت وسليم العبادىدانا حافضحكوا أنا حاوصلها

للأمين نفسه ، انا لازم انجح ، عارف يعنى ايه أنجح لصوص (فى هياج) حراميه انا وراكوا

والزمن طويل (ثم رمى السماعه فى غضب) (وهو فى حالة هياج امسك بخناق سلامه) أنا لازم

انجح ولو على جثت أهل البلد ، يا زعزوعة

[زعزوعة لا يابه بما يدور ومازال يواصل هو والطفل دورانه فى الصالون وهما فى صوت واحد ،

شى حا ، شى حا]

(يمسك الحاج فتحى زعزوعة ويرفعه من قفاه) زعزوعة عملها سليم العبادى والمحافظ يا زعزوعة ،

ضيعونى !!

زعزوعة : وانا مالى ، انا حمار

الحاج فتحى : ضيعونى

زعزوعة : أنا حمار [وهكذا كل يرد على حده]

ثم يقفل الستار

المنظر الثاني

[صالون واسع به عدد من الكنب شغل عربى ، وتنجيد متواضع ومساند معتاده مرتبة بنظام ، تراييزة سفرة موضوعة فى الوسط ،

الحاج عشاوى يجلس الى احد المقاعد واضعا رأسه بين يديه فى حالة وجوم وحزن شديدين وشاب وسيم يجلس بالقرب منه يرن جرس الباب ، يقوم الشاب ليرى من بالباب]

الحاج عشاوى: إسمع انا مش موجود ، نايم فى مشوار ، اى حاجه المهم مش موجود

الشاب : (يسمع للحاج عشاوى يذهب ليفتح الباب ، وبصوت عالى ليعلم الحاج عشاوى) مين سليم باشا الحاج حمزة ، أهلا وسهلا

سليم باشا : ايه قافلين على نفسكم ليه ؟

الحاج حمزة : حد ينجح فى الانتخابات ويروح البرلمان ويقفل على نفسه !

الحاج عشاوى: (يتأهب للقيام ويسلم عليهما ومازال على وجهه آثار حزن) أتفضلوا شاي يا فريد

الحاج حمزة : ليه ماكنش شربات

سليم باشا : الظاهر ان الحاج لسة متأثر باللى حصل

الحاج عشاوى: (فى لامبالاه) هه انت شايف ايه يا سليم باشا

سليم باشا : شايف انك تنسى ومتضيعش فرحتنا ، قد ايه الناس عايزين يجوا بياركولك ، بس لما علموا انك مابتقابلش حد وقافل على نفسك ، الصراحة زاد احترامهم لك ، بس لكل حاجه حدود

الحاج حمزة : وبعدين ماتنساش النذر اللى وعدت به (يضحك) ، راسين عجل

الحاج عشاوى: (بتهمك) وسهرة بفرقة وغازية ترقص (يهز رأسه) شوفوا بقى ياسليم باشا أنت والحاج حمزة ساعدتوني فى الانتخابات اى نعم ، وقفتم جنبى ماشى ، وشكر الله سعيكم ، ولكن عمري ما حنسى أبدا انكم عملتوا فى فصل أو مقلب ، وأزاي انا شربته معرفش !

سليم باشا : ازاي يا حاج تسمى دخولك الانتخابات ، ووقفنا جنبك ونجاحك ودخولك البرلمان ، أزاي تسميه مقلب !

الحاج حمزة : معقول يا حاج عشاوى ، يطلع فى الاخير كل ده مقلب !

الحاج عشاوى : أيوه مقلب ، وذنوب كبير ، تقدر تقوللى يا سليم باشا يا راجل العدالة ، ايه ذنب الناس اللى ماتوا فطيس مش حرام يموت خمسة من خيرة شباب الدايرة ، غير اللى اتصابوا ، تقدر تقوللى ايه ذنب أهاليهم ، ايه ذنب ولادهم اللى بقو يتامى ، والنسوان اللى أترملت ، لو أننا فى حرب كنا قلنا ماشى فيه عدو ، لكن دى حرب من غير سلاح من غير أعداء ، الواجب فيها الشرف والنزاهة ، كدا بقت عداوة بقى ارهاب (كان جالساً قام نحو سليم باشا) تصور أنى الحاج عشاوى اللى فى عين الصغير قبل الكبير انسان محترم (يتجه نحو الحاج حمزة) لمحت فى نظرات الناس أكبر أتهام ليا ، خصوصا وأحنا ماشيين فى جنازة حماده أبى الشيخ سليمان ، حماده اللى كانت دخلته يوم الخميس الجاى ، حاجه فانتنى حضرتوا الدفنة ، ومحضرتوش الزفة كانت ليلة امبارح (فى حزن والم) محضرتوش امه وأخواته البنات وخطيبته اللى لا فرح بيها ولا فرحت بيه ، وبنات الحارة ، والجثة الملفوفة بحريير ، وهم بيزفوه ودخلوا بيه أوضة النوم اللى كانت جاهزة للفرح ، ونيموا الجثة على السرير ، وأمه تزغرد وتغنى ، وأخواته البنات والصبايا م الجران واهل الحارة يرددو وراها

[فى تلك اللحظات تخبوا أضواء المسرح وتدخل جوقة تغنى تلك الاشعار]

من زمان شفت حماده من بعيد

عريس متحنى فى ثوب جديد

وجاى طائر من الفرحة ووشه سعيد

ينادى أمه أمه ومادد إيـد

ولسه بافرد أحضـانى

ومن الفرحة أنى اللى حاطير

(يواصل كلامه)

وتقول لى يا حاج حمزة اذبح جوز عجول وفرقة رقص ، طب نشترى خاطر الناس دى

المستشار سليم : طب وانت مسألتنش نفسك مين الي صنع الارهاب ، مين اللي ضرب بالنار مين الظالم ومين المظلوم

المحافظ بنفسه هو اللي أمر قوة الامن تجيب الصناديق ، والأهالي يققوا لهم وحصل اللي حصل ودى مش عايزة ليه ، ولولا انى كنت موجود ساعه الفرز كنت زمانك فى خبر كان، وكان زمان العمادى عنده طبل وزمر بدل مهو عملها جنازة وانكشف المستور والرشاوى اللي كان مقدمها(بعد صمت قصير) عرفت يا حاج مين اللي صنع الارهاب ؟

الحاج عشاوى : (فى ذهول) وليه ؟ الدم اللي سال عشان ايه ، هو اسمه محافظ ليه يا سليم باشا ؟ (فى اضطراب وعصبية زائدة) والله دى مفهومه زى الشمس ، عشان يحافظ على الامن على ارواح الناس ، (فى هدوء ما قبل العاصفة) لو كانوا عرضوا على التنازل ومايحصلش اللي حصل ، كنت اتنازلت (فى توتر وعصبية زائدة) واللى زى ده مين اللي يحاسبه يا سليم باشا ؟

المستشار سليم : أطمئن يا حاج (فى سخرية) فى حركة تنقلات ينقلوه لمحافظة تانيه (فى جد) شوف يا حاج ثلاث أربع الناس اللي حاتقبلها فى المجلس وصلوا بنفس الطريقة ، ورغم ذلك ما فكروش زى ما انت عمال تعصر نفسك ، والعجيب إنهم بيجوا على كده وما شاء الله عليهم ، وفى نهاية الدورة ، الواحد فيهم تشوفه سمين ومبغدد و عليه راس مكفه (فى استطراد) احلى حاجه فى الناس دى انهم بينسوا (يقوم من مكانه وفى حدة) بينسوا يا حاج ، عارف يعنى ايه ، الدم اللي سال والضمير اللي غاب ، هو ده سلاحهم ، داغير الخداع والنفاق فى سبيل الذات ، وعندك مثال ، فتحى العمادى خمس سنين حد شاف وشه ، لكن رجع يتكلم بلغة الارقام (هدوء) شوف يا حاج ، إذا مشيت من هنا على المجلس أختار حاجة من حاجتي ، يا إما تسبب ضميرك قبل ما تمشى وهناك هاتعيش ذى أكثريتهم ، يا إما تكون الحاج عشاوى ، وساعتها حاتشوف اللي ما شفتوش فى حياتك ، قلت ايه ؟

الحاج حمزة : وبعدين يا حاج يا صابت يا خابت

الحاج عشاوى : صح كلامك يا حاج حمزة يا صابت يا خابت ، بس فى كل الاحوال ماقدرش اسبب عشاوى الحقيقى ، واروح عشاوى تانى!

سليم باشا : وهو ده اللي الناس عايزاه ، حقيقة الانسان اللي يمثلهم لانها من حقيقتهم (وهو يتأهب للانصراف) عشان كده يا حاج حنسيك مع عشاوى ، وثق انى تحت أمرك اى استشارة ، ما عليك انك تبلىغنى ، بس قبل ما ترفع ايدك فى الضلمة من غير ما تفهم ليه ؟

[يمد يه للسلام عليه والانصراف ، وهكذا يفعل الحاج حمزة ثم ينصرفا ويودعهم الحاج عشاوى عند الباب]

[يعود الحاج ويرمى بنفسه على أقرب مقعد ، ويضع رأسه بين يديه لتعود به الذاكرة الى الواء قليلا ، فيسمع اصوات من جنبات الصالون تصدر وكأنها نداءات وشكاوى مما حصل بالأمس القريب ، وخاصة ذلك الاجتماع الذى عقد قبيل الانتخابات مع أهل القرى ، (بالطبع الصالون شبه مظلم الا من دائرة ضوء مسلطة عليه) (يتذكر الرجل العجوز) [الصوت يتردد كالصدى] المعاش اللي بياخده حاجة بسيطة ، يعنى ما يكملش حق حقنة موصفالى حق ... حقنة موصفالى (ثلاث مرات صدى صوت)- ياريت تكلم لنا ام العواجز ، يمكن تلحهم شوية (صدى صوت ثلاث مرات)

[يمسح الحاج على جبهته ويعاود الاستغراق] (صوت الشاب يتردد) لم يشيعه أحد من القرية سوى أنهم أتبعوه الكره واللعنات ، تراه يا حاج هل تود ان تكون مثله ، أو يكون على يدك التغيير فتنال الحب والدعوات (صدى صوت كذلك ثلاث مرات)

[وكأن الحاج عشاوى فى كابوس يحاول ان يدفع رأسه نحو السقف فيعاوده صوت الام]

- ابنى يا حاج ربنا ما يوجعك فى ضنا ، ابنى يا سليم باشا ، ابنى يا ناس (يتلمل قليلا وكأنه يحاول الانفلات)

- سنتين وانا ادور عليه فى السجون كعب داير ، لا حس ولا خبر (يستسلم للأستغراق)

- راجع ياما انشاء الله راجع ، اوعى تقطعى الصلاة يا اما

[يفيق على صوت ابنه] [تعاود الانوار]

الابن : با با بابا

الحاج عشاوى : (متمللا وماسك برأسه) آيوه آيوه يا فريد

الابن : واحدة على الباب عايزة تقابلك

الحاج عشاوى: (فى تعجب) واحده ... مين الواحده... ولا اقولك خليها تدخل

[يذهب الشاب ليمسح لها بالدخول ، ما كاد يشير لها بالدخول حتى ينطلق الطفلان فى مرح ومن ورائهما امرأة زعبة السابق ذكرها]

الطفلان : (يذهبان نحو الحاج عشاوى وصوت واحد)

أهلا يا عموا فين الشيكولاته

(يضع الطفل يده فى صدر الحاج عشاوى فى برائه وممازحا أياه) [يخرج الشاب]

الحاج عشاوى: (يستبشر لقدم الطفلين ويربت عليهما بحنان) أهلا أهلا بالعفاريت عايزين شيكولاته طيب (ثم يخرج من جيب الصديري قطعتين ويفرقهما عليهما) هيه بابا عامل ايه ؟

الطفلة : (وهى تلتهم قطعة الشيكولاته بنهم) عموا عموا ، بابا زعبة بيسلم عليك ، وبيقول مبروك النجاح .

الطفل : (يكاد ينتهى من الشيكولاته) عمه انت غبت عننا ليه ؟

(ينظر تجاه امه الواقفة فى استكانه) كل مره اسأل ماما تقولى بكرة ييجى .

الحاج عشاوى: (ينظر تجاه المرأة التى تتلأأ عيناها بالدموع) ازيك يا ست زوبه ، عامل ايه زعبة ان شالله تكون صحته بقت كويسه

المرأة : (فى صوت واهن حزين) مبروك نجاحك يا حاج

الطفلة : (فى مقاطعة غير مقصودة) عموا يا عموا

الحاج عشاوى: (فى عطف) يا نعم

الطفلة : (هو انت فى المدرسة زيي !

الحاج عشاوى: (فى حيرة وتردد) ايوه ايوه لسه هاروح سنة أولى!

الطفلة : وحتاخذ دروس خصوصيه زينا !

الحاج عشاوى: (يرتسم الجد على وجهه) ايوه صحيح لازم آخذ دروس خصوصية من بكرة

(يلتفت نحو المرأة محاولا الهروب من أسئلة الطفلة) يا أهلا وسهلا انتى واقفه ليه ، أتفضلى يا ست زوبه (مشير نحو كنبه الجلوس)

المرأة : (وكأنها لم تسمع دعوته إياها للجلوس وما زالت واقفه) خلاص حاتروح البرلمان يا حاج ؟
الحاج عشاوى: (مدركا ما عليه المرأة من حال) أيوة رايح البرلمان يا زوبة (محا ولا أضفاء جوا
من المرح) يا ترى فرحانه ولا زعلانه ؟ (صمت وليس من رد)

(مسترسلا ومتكلفا الابتسام) انا عارف انك من الفرحة كنت أول وحدة واقفة فى طابور الانتخابات [لا ترد] (مما يزيد اضطرابا) أفكرت أصلا مافيش نسوان عادت تروح الانتخابات ، (فى سخريه)
هأ، اللي خلى نص الرجاله ماترووحش يبقى النسوان هي اللي حاتروح !

المرأة : (وكأنها لم تسمع مما قاله شئ) خلاص حاتنسانا يا حاج ؟

الحاج عشاوى: (ذاهلا لما سمع) معقول ؟ معقول !

[كان يود ان يخطب لها خطبه بليغة يبين فيها ما تعتمل فيه مشاعره الفياضة ، وما تحمله من حب
للناس والتضحية من أجلهم ، ولكن الحزن والأسى الذى يكتنف المرأة مما خلق جوا متوترا خاصا
للرجل، جعله يكبت فى نفسه كل ما يدور بها من صراعات] (وينهى بذلك الموقف) حتى لو أنى
نسيت ربنا ما بينساش !

[وتفهم المرأة بماذا تحمله جملته الاخيرة من معانى]

المرأة : (فى رفق وعاطفه تسوق امامها الطفلين ويستجيبا فى هدوء)

الحاج عشاوى: (يدس يده فى جيب الصديرى يخرج بعض من الاوراق النقدية ويسرع الخطى
ليلحق بها) زوبة ، يا ست زوبة (تقف قبل خروجها) خدى دول عشان لو ناقص دوا ولا أى حاجه
بالنسبة لزعبلة تجيبهاله !

المرأة : (فى صمتها المعتاد تنظر له نظرة أخيره) عايزين نشوفك بس يا حاج .!

(الفصل الثالث)

المنظر الاول

[ينفرج الستار عن منصة عالية يجلس اليها رئيس مجلس الشعب ، ومن على الجانبين

وعلى شكل دائرى مقاعد امام المنصة العالية ، يقبع من ورائها عدد من النواب وكل امامه بعض الاوراق ، ومن ناحية اخرى يظل وسط المسرح مفتوحا امتدادا للقاعة التى بها الجمهور ، وكان المكان هو مجلس الشعب أو يعطى شبيها له]

الرئيس : [فوق المنصة] نبدأ الجلسة بعرض اقتراح تقدم به النائب الاستاذ محمد نصر ، حول امكانية تدريس قوانين اللائحة القانونية التابعة للمجلس ، الاستاذ محمد يتفضل

النائب محمد : السيد الرئيس لما كانت المادة (١٠٠) من الدستور ثغرة فضفاضة لمن يتقدم للترشيح عن دائرته لمجلس الشعب ، وذلك الشرط الاخير المذكور وبكل صراحة تقول . ان يكون ملما بالقراءة والكتابة ، ولما كان هناك عدد لا بأس به من النواب الموقرين لديهم فقط الالمام بالقراءة والكتابة ، ان لم يكن هناك كما صادفنى بعض النفر ممن لا يقرأون ولا يكتبون ، فإن الطامة الكبرى ، أن الكثير من هم مثقفين ويشاركون بكتاباتهم وآرائهم حياة المجتمع هم اميون فى داخل هذا المجلس الموقر ، ولا اقصد بأमितهم الجهل بالقراءة والكتابة ، ولكن أمية ثقافية بالنسبة لممارسة الحياة النيابية داخل هذا البرلمان ، وهناك الكثير يعيشون تحت قبة البرلمان ويحضرون أكثر الجلسات ولم يقدموا ولو لمرة واحدة ، حق السؤال مجرد استفسار ، لأى من المسؤولين على اختلاف مسؤولياتهم ، والسبب بالدرجة الاولى عدم الجرأة على الكلام من أصله ، وذلك يرجع لجهله بعض النصوص للقانون او اللائحة المعمول بها إذا أراد النائب الرجوع اليها عند السؤال أو الاقتراح المطلوب تقديمه ، هذا من ناحية .. من ناحية ثانية كيف إذا اتخذ المجلس قرارا بالموافقة او الرفض ، بشأن الحياة السياسية للدولة أو الخطة العامة للتنمية الاقتصادية والاجتماعية ، والموازنة العامة للدولة او ممارسة الرقابة على اعمال السلطة التنفيذية ، كما هو مبين فى الدستور أقول كيف للمجلس أن يتخذ قرارا بعد المشاورة على اكبر عدد من الاصوات ، اذا كان بعض اصحابها يجهلون نص قوانين الشئ المطروح مناقشته من أصله ، (تحصل أصوات وهمسات أقرب الى الصخب وعدم الرضى مما يعرضه من الاقتراح) لذا اطرح يا سيادة الرئيس على سيادتكم التالى (أصوات عالية)

رئيس المجلس : (يضرب بيديه على المنصة) رجاء الهدوء حتى ينتهى الاستاذ محمد من كلامه ،
اتفضل يا استاذ محمد

النائب : (مواصلا) لذا اقترح يا سيادة الرئيس بإنشاء مدرسة لدراسة قوانين الدستور التى تتناول
الحياة النيابية فى مصر ، وخاصة اللائحة الخاصة بالمجاس ، هذه المدرسة تختص نواب هذا المجلس
الموقر وشكرا

رئيس المجلس : (يهدئ الموقف بعدما ازدادت الاصوات صخبا) من فضلكم من يريد التعليق
فاليفضل ولكن بهدوء

الحاج عشاوى : (يرفع يده طالبا الكلمة) سيادة الرئيس صحيح يمكن تكون دى المرة الاولى اللى
بطالب فيها بالكلمة ، وصرلحة اللى شجعتنى على الكلام ما اقترحه الاستاذ محمد نصر ، وبصراحة
اكثر يمكن انا واحد من اللى يقرأوا ويكتبوا بس للأسف لغاية الآن القوانين واللائحة التابعة للمجلس
معنديش فكرة بدور حول ايه ، ومفيش مانع ان يكون فيه مدرسة الواحد يستفيد فيها ويعرف عن القوانين
واللذى منه !

نائب بجانب الحاج ع : (بصوت مسموع) أقعد يا حاج وانا اللى بقول عليك راجل عاقل ورزين ما
بينتكلمش ، مدرسة ايه اللى حتتعلم فيها ، بعد ما شاب ودوه الكتاب

[بينما بينما كان الحال يزداد صخبا من أغلبية النواب ، ورئيس المجلس يحاول تهذئة الوضع ، ولا يجد
بد من ان يهدد بآلغاء الجلسة ليتحول كل ذلك الى اشارات وحركات بدون صوت ، لنرى ماذا يدور
على الجانب الثانى ، وذلك الحوار الجانبى بالطبع الحوار مسموع لدى الجمهور]

(أحد النواب يربت على صغ زميله السمين ليفيق من نومه)

النائب : (ينظر حوله) (وبصوت أقرب الى الهمس) حاج عباس حاج عباس

الحاج عباس : (وهو يتململ) ايه فيه ايه ! (ثم يعاود الشخير)

النائب : (وهو يهزه بشدة من كتفه) يا راجل اصحى ، يخرب عقلك حتفضحنا !

الحاج عباس : (فى ضيق) ايه يا فوزى مش مضيينا العقد واخذنا موافقة الوزير ! (يحاول النوم

(ثانيه)

النائب فوزى : (فى نرفزة) عقد ايه ووزير ايه ، العملية شعلت

الحاج عباس : (يحاول الإفاقة ويتثائب ، وهو يمد زراعيه لأعلى ليتمطى ،) إذا بزراعه الايمن
يصطدم برأس النائب الذى بجانبه)

النائب المصاب : (فى ردة فعل شديدة) ايه صح النوم يا حاج !

الحاج عباس : (خوفا من ان يكون سمعه احد) بس بس مش قصدى ، معلىش

النائب المصاب : ايه يعنى لو قلعت عينى هاتنفعنى ساعتها ؟

الحاج عباس : (يميل فى خفة نحو رأس النائب) وادى رأسك ابوسها (يتجه نحو النائب فوزى) ايه
يا عم فى ايه ؟

فوزى : عايزين يعملوا مدرسة !

الحاج عباس : مدرسة !..... تقلبنى من النوم وتقلى مدرسة ، هو احنا مشبعناش من حكاية هدم
المدارس والمساكل !

فوزى : بقولك عيزين يعملوا مدرسة !

الحاج عباس : طب وهى مدرسة واحدة تعمل معايا ايه ، وانت عارف مقاولاتى مدارس ومساكل من
الباطن ، مش مدرسة !

فوزى : يوه يا عم مقولات ايه ، باطن ايه ، عايزين يفتحوا مدرسة نتعلم فيها !

الحاج عباس : طب وماله مدرسة يتعلم فيها الولاد مش مشكله !

فوزى : (فى نرفزة) يا حاج نتعلم فيها ، (بتؤده) احنا نتعلم فيها هنا فى المجلس !

الحاج عباس : (فى سخرية) أحنا نتعلم فيها ، انا (يشير نحو نفسه) طول بعرض يتعلم فى مدرسة
فوزى : انا وانت نتعلم فيها

الحاج عباس : الله هي كل المشاكل اتحلت مفيش غير مشكلة تعليمنا ؟

فوزى : يا حاج عايز اقولك ؟

الحاج عباس : حثقول ايه (مقاطعا اياه) ، طب بيجوز انا بفك الخط بالعافية طب انتة هاتتعلم ايه وانت حاصل على البكلوريا !

فوزى : ما هو يا حاج ؟

الحاج عباس : (مقاطعا اياه فى حدة) ماهو ايه يا فوزى ، من يوم ما دخلت المجلس وانا قافل على خاشمي مفيش غير موافق آه موافق ، بس إن العملية توصل لحد التهزيق ده اللى مرضاش بيه !
(يهب واقفا)

فوزى : (فى هلع) يا حاج ، يا حاج ، افهم الاول وبعدين اتكلم ؟

الحاج عباس : (دون تردد) سيادة الرئيس (فجأة تقطع الاصوات)

رئيس المجلس : الحاج عباس يتفضل إذا كان لديه تعليق ؟

الحاج عباس : إيه اللى بيجرى دا يا سيادة الرئيس ، وإيه حكاية المدرسة دى ؟ مدرسة إيه اللى لسة حنتعلم فيها ، معقول يبقى عندى أولاد مخلصين جامعة وأنى أدخل مدرسة أتعلم فيها ، ثم إيه دخل المجلس فى حاجه زى كده ؟

[يشير عليه رجل قريب منه لا يقل عنه سمنة] [يشير عليه بالجلوس) (يواصل) لأ لازم اكمل كلامي يا أستاذ كمال؟

ثانيا هي كل المشاكل اللى فى مصر خلاص اتحلت ، معادش فيهم مشاكل ، ثم هومين صاحب الفكرة دى ؟

رئيس المجلس : هو انت كنت فين لما الاستاذ محمد نصر كان يعرض اقتراحه ؟

النائب محمد نصر : لو سمحت لى يا سيادة الرئيس بالتعقيب على كلام الحاج عباس

رئيس المجلس : أتفضل

النائب محمد نصر : سيادة الرئيس ، الحاج عباس لم يعرف انى صاحب الاقتراح ، ولم يعرف عن ماهية تلك المدرسة التى أقرحت بها ، وما الذى ادعوا له من وراء كل ذلك ، وعدم معرفة الحاج عباس لكل ذلك لأنه كان يغط فى نوم عميق كعادته (تضح القاعة بالضحك)

الحاج عباس : لا يا سيادة الرئيس : انا مكنتش نايم ، انا كنت باخد تعسيله (يشير نائب آخر بالتعليق)

النائب : (مشيرا بيده طالبا التعليق) يا سيادة الرئيس (يعطس بقوة) أشهد (يخرج منديلا يتمغط فيه)
يا سيادة الرئيس

نائب بجانبه : يرحمكم الله !

النائب الأول : بتقول ايه ؟

النائب الثاني : بقول يرحمكم الله

النائب الاول : يعني ايه ؟

النائب الثاني : يعنى قول غفر الله لنا ولكم

النائب الاول : كانت على لساني ، ثم هو ده وقته

الرئيس : خلص يا ابراهيم

النائب ابراهيم : لامؤاخذه يا ريس (ينظر عن يمينه ليجد الاستاذ كمال يشير له بالجلوس هو الآخر)
طب أفهم (مازال يشير لهم) (النائب ابراهيم فى نرفزة) مجرد استفهام....بلاش بلاش (يعطس)
أشهد (يستعمل المنديل) لامؤاخذه يا ريس كنت عايز أقول نهوي المكان شوية !

رئيس المجلس : الأستاذ كمال عزت

النائب كمال : سيادة الرئيس إن ما اقترح به الاخ الزميل نصر ليس ببدعة او جديد فى عالم البرلمانات ،
فى دول العالم المتقدم وخاصة أمريكا ، مجلس النواب يعقد كل عام دورة خاصة للأعضاء النواب
يقفون فيها على اهم ما تتضمنه القوانين والتشريعات ، سواء الجديد منها او حتى القديم ، ليتحقق للعضو
القدرة الكاملة على طرح ما يشاء من المواضيع والاستجابات ، او الموافقة على بعض التعديلات ،
وأرى ان مجلسنا هذا الوقر أجدر بأعضائه ان يكونوا على مثل هذه الدرجة ، وأظن انه لدينا من
الاساتذة الاعضاء هنا ، القدرة على العطاء وألقاء المحاضرات ، وخاصة ان مثلكم يا سيادة الرئيس له
باع طويل (تنفرج أسارير رئيس المجلس للجملة الأخيرة من كلمة العضو كمال عزت)

رئيس المجلس : وانا أول من يلقى المحاضرات نزولا على رأى الاستاذ كمال ...والكلمة الآن للأستاذ

محمد طایل

النائب محمد طایل : لا شك ان كلمة مدرسة يا سيادة الرئيس تثير في النفس شكوكا عديدة ، وتثير مشاعر السخرية ، مما يزيد الفجوة والفرقة بين النواب الموقرين على اختلاف ثقافتهم ومشاربهم ، وخاصة اننا نختلف عن باقى دول العالم المتقدم ، فلو انه هناك قليلا من الديمقراطية المرجوة كما هو متوافر لدول العالم وكما يضرب الاخ الزميل بذلك مثلا ، وذلك فى اختيار العضو فى انتخابات نزيهة ، لما كان هناك داع من أصله لتلك الدعوة المثيرة، أو ذلك الاقتراح ، الذى يعد شاهد أثبات على مدى التخبط والهوجائية ، والطرق الغير شرعية للوصول لهذا المكان ، والتي تدلل عليه كثرة ما صدر من أحكام من محكمة النقض (صخب وأصوات عالية تحاول التشويش على النائب طایل)

النائب طایل : (بصوت عالى) هى دي تزعل فى ايه ؟

رئيس المجلس : يا أستاذ محمد انت خرجت عن الموضوع الذى تقرر سماعه !

[نائب يطلب الكلمة]

رئيس المجلس : النائب عبد العزيز

النائب عبد العزيز : يا سيادة الرئيس هل هذه المدرسة تعنى فصول وسنوات دراسه ، أولى وتانيه الى آخره ، ونظام حصص ، وإذا كان الأمر كذلك ، الخوف ان يكون فى دروس خصوصية لا يقدر عليه إلا المستطيعون ، وانت عارف سيادتك كفيانا دروس خصوصية لأولادنا ، أفيدونا فى الأمر يرحمكم الله [يكتر اللغط والهمهمات فى جوانب القاعة]

[بينما يلقي نائب آخر بكلمته يتحول ذلك الى اشارات وحركات ، ليسمع على الجانب الآخر ذلك الحوار الهامس بين نائبين أحدهما بجلباب]

الأول : بخت مايكون في دروس خصوصية يا أستاذ أمين

الاستاذ أمين : مش بعيده ليه لأ ، اللي خلى الدروس الخصوصية توصل الجامعات و المعاهد العلمية مش بعيده تحصل لو فتحو مدرسة فى المجلس

النائب الاول : معناه الراتب والحوافز اللي بتطلع من الجلسات ومنتظرها بفارغ الصبر ، هاتروح هادر على موضوع هايف زى ده

النائب أمين : فيه حاجة تانية !

النائب الاول : ايه هيه ؟

أمين : الدروس الخصوصية هنا فى المجلس غير الدروس بتاعة الطلبة

النائب : أيوه أيوه

أمين : (يزيد الوضع سخونه) يعنى دروس الطلبة بالنسبة لدروس المجلس يعتبر لعب عيال ،
وخصوصا الفلوس !

النائب : أتارى رئيس المجلس بيقول نزولا على رأى الاستاذ فلان مستعد لألقاء المحاضرات

أمين : أمال يا حبيبي كان لازم تفهم كده خصوصا ان الاستاذ قانون ومؤلف كام كتاب يمكن والله أعلم
بيقوا مقررين علينا ، وشوف الكتاب لوحده سعره يبقى كام

النائب : بس بس بدأت أفهم (هب واقفا)

أمين : هتعمل ايه ؟

النائب : هنتفرج هعمل ايه (وبصوت عالى) ياسيادة الرئيس

أمين : طب انتظر اما النائب يخلص كلمته (بالطبع تعلوا الاصوات ، والنائب يختم كلمته يقول لذا
أدعوا يا سيادة الرئيس ان تقتصر المدرسة على الأخوة الذين أتوا الى البرلمان لأول مرة وشكرا)

النائب السابق : (يرفع يده طالبا التعليق)

رئيس المجلس : أتفضل يا سالم

النائب سالم : يا سيادة الرئيس تفتكر الألف وخمسية ملطوش اللي بنحصل عليهم ممكن نوفر منهم حق
الكتب والدروس الخصوصية ، ولا حتى في وقت يقدر الواحد يوفر ممن مجهوده ما بين المجلس وشغلنا
بره ، انا واحد من كتير هنا مايقدرش يعتمد على الراتب ، لازم من سبوبة على شان يقدر يواصل
حضور المجلس ، وده كله ميسمحش أدخل مدرسة ولا ادفع حق كتب أو دروس خصوصية

الرئيس : (فى نرفزة) ايه حكاية الكتب والدروس الخصوصية ، هو احنا فى مدرسة

أحد النواب من بعيد : مانتوا عايزين تعملوها

الرئيس : دى عملية اقتراح بتعلم الاخوة النواب الذين يجهلون بعض نصوص الدستور الخاصة بالحياة
النيابية فى مصر ، وخاصة ما يتصل بالمجلس ، وعملية التعليم هى اللقاء بعض المحاضرات من قبل

الأخوة الذين لهم باع طويل فى الحياة البرلمانية ، وقلت سوف أكون اول واحد يلقى المحاضرات وهذا
مجانا منى

[ينظر النواب بعضهم الى بعض ومرة أخرى ترتفع الاصوات]

الرئيس : (يضرب على المكتب) الاستاذ على اسعد يتفضل

النائب أسعد : لقد أخذت عنا فكرة خاطئة لدى الجمهور العام فى مصر ، أن أعضاء البرلمان هم أغنى
الافراد ، والذي يجهله الكثير جدا اننا افقر برلمان بين دول العالم ، على الاقل برلمانات الدول العربية
من حيث الامكانيات المادية التى يجب ان تتوافر للعضو ، حتى تتسنى له الراحة النفسية والجدية معا
ويغنيه ذلك عن أى أعمال حرة خارجا ، لذلك يمكنه المشاركة الفعالة تحت قبة البرلمان وتجعله دائما
الاتصال بفاعليات الحياة الاقتصادية والاجتماعية وغيرها ، مما يهم الدولة وموقعها بين دول العالم فأنا
أجزم ان الكثير هنا تحت قبة البرلمان ما عدا فئة قليلة ، أتوا من أجل الوجاهة والمنظرة ، فهم يعلمون
تمام العلم ضعف الامكانيات المادية داخل المجلس ، فالألف والخمسمائة جنيه ليست بذات قيمة لهم فقد
يتوفر للواحد خارجا أرباحا طائلة تلتهم أمثال هذا المبلغ ، فكيف يتثنى لمثل هذا العضو ممارسة الحياة
النيابية فى المجلس ، وهو مشغول بزيادة نشاطاته الخارجية ، أو على الاقل حضور محاضرة يتسنى له
فيها فهم بعض نصوص الدستور وشكرا

صوت أحد النواب من بعيد : يا سيادة الرئيس بلاش سيرة الألف وخمسمائة جنيهه الانسوانا يغضبوا
علينا (ضحك يملأ القاعة)

الرئيس : (ضاحكا) نكتفى بهذا القدر من الآراء والتعليقات ويؤخذ برأى الأغلبية فى موضوع انشاء
فرع تعليمي ، للنواب الذين يجهلون بعض نصوص الدستور وما يتصل به خاصة المجلس
هه ، الموافق يرفع ايده (ينتظر لحظة) غير موافق إذا غير موافقون ، ترفع الجلسة وتعقد مساء الاحد
القادم ان شاء الله .

(المنظر الثانى)

صالة عريضة وبعض المقاعد القابع عليها عدد من النواب ، وغرفتين على الجانبين للصالة وفى الامام غرفة مكتوب فوقها ((الصيدلية)) ولها شباك صغير ، اما الغرفتين فالتى على اليمين مكتوب عليها لوحة صغيرة (الكشف) والتي عن الشمال مكتوب عليها (التحاليل الطبية)

[يدخل الحاج عثماوي وأحد النواب معه]

الحاج عثماوي : اما غريبه يا استاذ محمود حكاية النواب اللى ماوقفوش على اقتراح المدرسة ده !

النائب محمود : يا حاج ما غريب الا الشيطان ، اهو انت دخلت على سنة فى المجلس ولسة غايب عنك حاجات ياما قوى

[يتجه نحو كرسيين] (ما زال يواصل كلامه أفضّل يا حاج) (ويشير بالجلوس الحاج عثماوى]

الحاج عثماوي : وايه الغلط ولا العيبة فى الموضوع ده ، انا أول واحد نفسي أتعلم ، طالما جيت هنا لازم أسد ولا بقى كماله عدد

محمود : انت يا حاج جيت قبل كده المكان ده ؟

الحاج عثماوى : دى شكلها عيادة اول مرة أجيها !

[لم يكد يجلس الاثنان حتى تحدثت أصوات مشادة بين أحد النواب ذى جسم ممتلئ ويلبس جلباب بلدى ورأسه صلعاء إلا قليلا ، وتحصل المشادة عند شباك صرف الادوية الصغيرة]

النائب : ماهى الرشوته دى لازم تتصرف هو انت بتجيب من بيتكم !

الصيدلي : (من الداخل) يا باشا أولا مالوش لازمة الغلط ، الملف تبع سيادتك مسحوب عليه بألف جنيه وملكش تصرف اكثر من كده

النائب : ليه مانت صرفت قبل كده لكذا واحد ، ملفه مسحوب عليه بألف جنيه ، ولا علشان مش تبع الوطني

الصيدلي : أيه اللى دخل الوطني فى أمور زى دى ، ده كلام يودي فى دهبه ، وانا حكنتب مذكرة بكده

[يتدخل نائب آخر]

النائب المتدخل : ايه بس يا دكتور حمدي مش معقول اللي بيحصل ده؟

الصيدلي : سامع يا باشا الحاج شربتلي يتهمني بالرشوة هو انا وش ذلك ؟

النائب المتدخل : طيب بس هدي نفسك (يلتفت نحو شربتاي) ايه يا حاج صحيح الكلام ده

شربتلي : سيادته مش عايز يصرف لى الروشته قال ايه أستنفدت المبلغ المقرر ليّ ،

طب ايه رأيك انا ماسحبتش بنص المبلغ وعايز أراجع الحساب

[يتدخل نائب آخر يريد صرف دواء له]

النائب ٢ : يا دكتور حمدي الجلسة حاتبدأ و مش فاضيين للحسابات !

النائب ١ : طب عموما أصرف أصرف له على ملفي وسجل علىّ

الصيدلي : يا باشا انا ماقدرش أصرفله على ملفك خصوصا أنا بسجل انواع الادوية الخاصة لكل واحد

على ملفه من الروشته (ينظر فى الاوراق) الملف عنده فيه ضغط دم + السكر وانت يا باشا الملف

تبعك فى آخر مره فيه حالة أرتيكاريا !

النائب ١ : خلاص يا أخي بلاش فضايح (متوجها نحو الحاج شربتلي) روح يا حاج هات له أستثنى

من الرئيس نفسه وريح بالك

[يتقدم نائب نحو الحاج عشاوي والاستاذ محمود والذان كانا يراقبان الموقف]

النائب : سلام عليكم

الاثنان : (فى صوت واحد) وعليكم السلام

الحاج عشاوي : أتفضل يا أستاذ هارون

هارون : (بعد ان يقرب كرسي وينضم لهما) ايه يا حاج منتظر الكشف ولا لك تحاليل

الحاج عشاوي : لا دا ولا دا

هارون : يبقى الأستاذ محمود

محمود : عموما لى تحليل أخده

هارون : أنما هى العياده مقلوبه كدا ليه النهارده ؟

الحاج عشاوي : ما انت عارف الجلسة اللي جايه الظاهر عليها سخنه أوى ، خصوصا حكاية سحب الحصانة من نائب المعارضه سالم النجار ؟

محمود : والظاهر والله أعلم إخوانا الوطنيين طابخنها مطبوط !

هارون : بس ظنى إن جماعة المعارضه مش هيفوتوها بسلام !

الحاج عشاوي : بالله ياسيدى لهم حق يطهقوا بقى النائب الوحيد لحزب العمل من بين ٤٠٠ عضو ، مش نازل لهم من زور !

[فجأة تحدث اصوات صاحبه عند شباك الصرف]

نائب : (فى صوت عالى) يعنى ايه مفيش الدوا ده ؟ هو إحنا فى مستشفى حكومى حتدينى شوية حبوب سلفه وبالسلامه ، طيب لما الدوا ده مش موجود ، الدكتور عوض بيكتب عليه ايه ، معناته أجييه من أجزخانة بره

الصيدلى : ياباشا دى

النائب : (يقاطعه) باشا ايه وزفت ايه ، كل واحد يكلمك تقول له ياباشا ياباشا دنا أنفجرت من الكلمة دى (فى سخرية) هو الملك فاروق عاد لمصر المحروسه ولا ايه ؟ (يتوجه نحو الجالسين) مايمكن رجع واحنا قاعدين هنا (يتجه نحو الصيدلى) تعرف يابنى زمان صوت الباشا كان يزلزل البرلمان ، صوته كان يوصل جنوب السودان ، كان يهز كيان اكبر امبراطوريه فى العالم ، كان يخسف بالارض احسن حكومه دكتاتوريه (فى حده) شوف الباشا بتاع النهارده ، احلف يمين فيهم اللي مايعرف الألف من كوز الدره ، واللى وصل على جثث الموتى والقنلى وزوى العاهات المستديمة ، الباشا بتاع النهارده صوته ما يوصلش لجنوب أسوان ، ما يحرکش شعره فى الوجدان ، ولا حتى شعره فى راس النتن ياهوه ياهوه (أكثر حده) هوأنى جانى ضغط الدم من شوية يا حمدى بك ، ابقى اتفرج يادكتور عالى حيحصل فى الجلسة اللي جايه من اول مره وبأتفاق الاغلبيه ومن اعلى حترفع الحصانة البرلمانيه عن نائب اتمسك بحصانه أفضل من حصانه امريكا ، حصانه لا اله الا الله (فى هدوء) وعموما ماتز علش ياس حمدى وأدى الروشته (ثم مزقها الى وريقات متناثره)

الحاج عشاوي : مش قولتلكم أهو دا واحد مستقل وطهقان ، امال المعارض يعمل ايه ؟

هارون : معارضه (فى سخرية) معارضة ايه يا حاج إذا كان هم فى حد ذاتهم مابيحبوش بعض ، وكل حزب فيهم عامل لنفسه خط سير مايتلقاش مع الحزب التانى ، وده فى حد ذاته يضعف جبهتهم ومواقفهم مافيش تناسق ولا تلاقى حتى المستقلين كل واحد مع نفسه دا إذا عاد فيه مستقلين مانضموش للحزب الوطنى

[صوت ينادى من غرفة التحاليل]

الأستاذ محمود : (يهب واقفا) نعم (للحاج والأستاذ هارون) بعد اذنكم

[على طاولة قريبة جلس نائب الى زميله وفى يده ورقة تحاليل]

النائب : إزيك يا استاذ جمعه

جمعه : أهلا (الحاج رشوان يلاحظ ورقة التحاليل فى يده) إيه اخبار التحاليل معاك ؟

الحاج رشوان : تصدق بعد العمر الطويل ده ، يطلع عندي اسكارس وبلهارسيه (ثم يناوله الورقه)

جمعه : ليه هوانت يا حاج على كده عندك أرض ؟

الحاج رشوان : منين يا حسرة ، دول طالعين إيجاره مابستتفعش منهم ، خيرهم رايح للفلاحين المستأجرين

جمعه : عموما يا عم ابسط كلها كام شهر ويرجعواك ملك خالص

الحاج رشوان : قد إيه منتظر اللحظة دى عشان أطردهم زى الكلاب ، زى ماذلوني أبا عن جد

جمعه : الله ليه كدا يا حاج

الحاج رشوان : يا أستاذ جمعه عمرك شفت فدان بـ مش حق قيراط إيجار برسيم كام وش ، الواحد من الفلاحين فيه خبث يكفي المجلس ده كله ، ويدعي الفقر ، يدخل المحصول على المحصول ويخزن ويبيع وآخر السنه يدىك شوية ملاليم .

جمعه : (وهو ينظر فى ورقة التحاليل) الله إيه ده

الحاج رشوان : فيه حاجه تاني غير الزفت دول .

جمعه : بس دي حبوب منع الحمل

الحاج رشوان : (فى تعجب) أني مكتوبلي حبوب منع الحمل

جمعه : ثم قلتي انت اسمك رشوان ابو جعبوب ، ولا فضيله عبد الله

الحاج رشوان : فضيله فضل الله (يضرب على جبهته) يا أخى الأولانى رشوان رشوان ، داهيه
تخرب بيته !

جمعه : طب ألحق بدلها شوف ورقة التحاليل بتاعتك ، الا دى روشتة مدام فضيلة مانت عارف لو
علمت ان الروشتة معاك حتردحك خمسة بلدي !

الحاج رشوان : إيوه جد (ثم يتلأ قليلا) قولي يا استاذ جمعه ، هي الولية فضيله دى لسة بتاخذ
حبوب منع الحمل

جمعه : ياراجل ، انت مالك ، هو انت اللي بتاخذ ولا هي

الحاج رشوان : (ينظر ناحية الزحام أمام الشباك) يا نهار أسود ، دى جايه علينا يا أستاذ جمعه .
جمعه : مش قلتك

مدام فضيله : (بسخريه) هي الروشتة معاك يا حاج رشوان

الحاج رشوان : (فى اضطراب) إيوا إيوا يا حاجه فضيله

مدام فضيله : (في سخريه) حاجه ؟ (وهي تتناول الروشتة وترمي له بورقة تحاليله) اللي أنكسفوا
ماتوا لما انتا عندك اسكارس وبلهارسيه وفوق ده كله ما بتعرفش تقرا ولا تكتب ، جاي المجلس تهبب
أيه ؟

الحاج رشوان : سامع يا استاذ جمعه (فى شدة الأخراج) هي حصلت يا حاجه فضيله ؟

فضيله : تاني .. طب والله العظيم لـ..... (وبسرعه يدرك الحاج عشاوى الموقف الذى يأخذ بيد الحاج
رشوان)

الحاج عشاوى : (لمدام فضيله) معلىش يا مدام فضيله خليها عندي (بينه وبين الحاج رشوان) هو
انت يا حاج خلاص معندكش تمييز !

الحاج رشوان : يعني ايه يا حاج عشاوى هو انا غلطت في حاجه ؟

الحاج عشاوى : انا فاهم كل اللي مدايقها انك بتكبرها أكثر من سنها وقلتك ليها يا حاجه

الحاج رشوان : (فى تعجب) صدقوا ده واسمعوا ده ... بقى اللى بقولها يا حاجه عشان أكبرها وأقدرها بتزعل ! لالا ماطنيش المرة الجايه أقولها (فى سخريه وهو يهز جسده هزة خفيفة) آبله.....آبله فضيله

الحاج عشاوى : طب نعالى وهدى نفسك (مشيرا له بالجلوس) أتفضل .. ما انت عارف الجماعه الحريم دول عقلهم ناقص !

الحاج رشوان : لا يا حاج ، دى عقلية ناقص ؟ دي آروبه .. انا عارف ايه اللى مدايقها منى ، فاكركم الجلسة أياها ، اللى كانت عن ختان البنات وكانت هي شاربه الجلسة ، ورحت انا مقاطعها ، وقلت بقا يعني يا ريس كل المشاكل انتهينا منها مفضلش غير الموضوع ده ، اللى الواحد ينكسف حتى يذكره على لسانه ، ويمكن انت سمعت التبرطيم بتاعها بعد الجلسة علياً

الحاج عشاوى : والله جايز ، صحيح انت ساعتها كبستها !

الحاج رشوان : يا حاج اللى ضايقتي أكثر ان الموضوع الهايه ده شد رجاله نواب محترمين قوى ، بس يا خساره ساعتها نزلوا من نظري

[يجئ الاستاذ محمود سويلم وما كاد يجلس ، حتى يستأذن الحاج رشوان فى الانصراف]

الحاج عشاوى : هه ، خير أن شاء الله

الاستاذ محمود : (مطبقا على أصابع يده ما عدا السبابه) كده يا حاج !

الحاج عشاوى : طب يالله ألا أني مش مرتاح فى المكان ده

الاستاذ محمود : طب شويه بس الصيدليه تخف عشان اصرف الدوا ده !

الحاج عشاوى : ليه ما انت ماشاء الله عليك ، ليكون عندك ضغط دم انت الثاني

الاستاذ محمود : لا من دي أطمئن مفيش حاجه فى الدنيا تستاهل ضغط الدم (يقترب من أذن الحاج

عشاوي هامسا) الروشته دي فيها كبسول يخليك طول الليل زى الأسد الهصور!!

الحاج عشاوى : (فى تعجب) طب وأيه اللى يخليك تبقى زي الكلب المسعور! (وهو يتأسف)

الأسد.. الأسد ، الـ الـ

الاستاذ محمود : (بسرعه وفى ضيق) الأسد الهصور

الحاج عشاوى : لا مؤاخذه يا أستاذ محمود ... بس الكلام ده للمتعين في شركة أمن

الاستاذ محمود : شركة أمن ايه يا حاج ، حسألك سؤال ، أيام ما كنت عريس جديد ، الشباب الذى

مضى ، يعني ، مش كنت كده شقي ، وشايف نفسك شويه ، خصوصا

الحاج عشاوى : (قاطعه) فهمت فهمت ، بس ده شئ طبيعى يا أستاذ محمود ، هو الواحد حياخد

زمنه وزمن غيره ، يبقى عندي ابن شاب ومتجوز ، وشايف نفسه شويه ، أحط راسي براسه فى العمر

ده

الأستاذ محمود : بس بس ، أهو الكبسول ده يا حاج يخليك تحط راسك براسه

الحاج عشاوى : ياوقعه مهيبه كبسول يخليك (يشاور بأصبعه كمن يرسم نصف دائره ويعاود)

الاستاذ محمود : آيوه يخليك ديبوكيكمره يا حاج واحد صاحبنا خد من الكبسول ده وناسي إن

مراته فى زياره لأهلها وفين ، فى تاني بلد (يسكت قليلا) كانت ليله يا حاج .

الحاج عشاوى : ايه راح لمراته تاني بلد؟

الاستاذ محمود : يا ريت

الحاج عشاوى : امال ايه؟

الاستاذ محمود : مراته جات تاني يوم الصبح لقاته مقطع المراتب والمخدرات !

الحاج عشاوى : (فى سخرية) أتارى كان بيفش غله (صمت قليل) تعرف يا استاذ محمود انت

كنت فى نظري كبير أوى !

الاستاذ محمود : ليه يا حاج هو أني غلظت ، هى الحاجه دى لو غلظ كانوا صنعوها من أصله ، دا

شئ عادي يمكن بيحل مشاكل كثير خصوصا الناس اللى فى سني وسنك ، إذا مش مصدق ، ممكن

تسأل الشيخ إبراهيم عصفور المفتي اللى دائما قاعد آخر الصفوف !

الحاج عشاوى : (فى سخرية مشوبة بالحزن) حتسأل على آيه يا استاذ محمود هو ده وقته ولاده

مكانه (يسرح قليلا) انت فكرتني بالراجل العجوز اللى جاني فى الخيمه لما كنت عامل اجتماع ايام

الانتخابات ، يقوللى ، المعاش اللى باخده يا حاج حاجه بسيطة قوى ، مش حق حقنة موصوفالي (وهو

فى حالة سرحان) كنت تشوف شكله وهو ببسعل و صدره وهو بيزيق ، والسيجارة اللف فى أيده مش

قادر يستغنى عنها (يصوب نظرة تائها للأستاذ محمود) الواحد بيتعجب لحال الدنيا ، ناس بتلاقي تجيب دوا للعجز السفلي ، وناس مش لاقية تجيب دوا للجذع العلوي ما علينا ، هو اسمه ايه المهيب ده ؟

الاستاذ محمود : (وكأنه منتصر) ايه يا حاج بتسأل على اسمه ليه ؟

الحاج عشاوى : (يهز راسه ساخرا) من بابا المعرفة !

الاستاذ محمود : اسمه ميلاتونين

الحاج عشاوى : ميلاتونين (فى تعجب) الله مش الدوا ده اللي الاستاذ ابراهيم حسنين سأل فيه وزير الصحة من كام يوم ؟

الاستاذ محمود : أيوا فاكركم الجلسة دي ، لما كتير من النواب كانوا مزمزقين من ابراهيم حسنين ، انت عارف ليه ؟

الحاج عشاوى : عرفت ، عرفت ، لما كان بيسأله ايه السبب فى سرعة انتاج الدوا ده بالذات ، رغم انه فى أوروبا وباقي دول العالم بيحظروا من خطورته من نواحي تانيه !

الاستاذ محمود : (مداعبا) يا خطير يا حاج

الحاج عشاوى : تعرف دار فى نفوخي أشرب حجر جوزة قبل ما ندخل الجلسة المهيبة (وهما يستعدان للتحرك ، والزحام بعد ما زال ، إذا ببداية مشادة كلامية بين احد النواب والصيدلي)

النائب : ماهو لازم نعرف هي دي صيدلية ولا الاسم صيدلية ، طب فين الاقي الكبسول ده ، هو الاسم لينا ملف ونجيب من بره !

الصيدلي : يا أستاذ عبد الحميد

النائب : تانى ... تانى يا " استاذ " انت عارف استاذ دي تبقى ايه ؟

الصيدلي : (منفعلا) أياك تقولي زى زميلك الباشا ، أستاذ دى زمان كانت تهد الدنيا وتقعدھا ، وتدخلي

فى الدور اياه .. اسمع يا محترم مش عاجبك الوضع على ما هو عليه . قدم شكوى لسيادة الرئيس ،

وآني بجيب من الشركة اللي وارسها عن أبويا ،

ثم أنى مالى اللى عنده ضغط دم ، ولا اللى عنده السكر ، واللى عايز فيتامينات ، الدور والباقي عالى
عايز ميلاتونين ، مجلس شعب ده ولا دار مسنين

النائب : احفظ لسانك يا محترم ، معروف انك بتصرف بمزاجك ولمين ، ابوا ، ماهو الحق مش عليك

الصيدلى : شاهدين ، شاهدين يا بشوات على الكلام ده ، انا باللى حصل النهارده ، بشوف لنا صرفه
فى الموضوع ده

(ستاره)

المنظر الثالث

[فى داخل قاعة المجلس النواب فى انتظار مجئ رئيس المجلس لبدء المناقشة حول رفع الحصانة عن النائب سالم النجار ، وفي اثناء ذلك يدور ذلك الحوار بين الحاج عشاوى والاستاذ محمود]

الحاج عشاوى : (وهو ينظر في الساعة) الساعة دي دلوقت داخله على تمنيه هو الموضوع ده مش كان انتهى في جلسة الصبح والكل وافق على عدم رفع الحصانة عن النائب سالم النجار

الاستاذ محمود : يا حاج اللى بيحصل ده تنفيذ اوامر عليا ولجنة الشئون الدستورية مجتمعة دى لوقت ولما يتعرض الموضوع ده على المجلس تتفرج على اللى حيحصل

[فى تلك اللحظات يدخل رئيس المجلس ومعه عدد من الشخصيات التابعة للجنة الشئون الدستورية والتشريعية ، رئيس اللجنة يتخذ مقعده مباشرة أمام رئيس المجلس في مستوى أقل علوا عنهم ويفرد الاوراق التى امامه]

رئيس اللجنة : سيادة الرئيس ، بعد ما راجعت اللجنة المذكرة المقدمة من قبل مباحس أمن الدولة الخاصة برفع الحصانة عن النائب سالم النجار ، عن دائرة حلوان التبين تمهيدا لاتخاذ كافة الاجراءات المتبعة للتحقيق معهم ، والتي تذكره صراحة بتزعمه تنظيما مناهضا للحكومة ، وفي الجلسه الصباحيه نظر المجلس فى ذلك الامر وسمح له بأخذ اقواله مع عدم رفع الحصانه عن النائب ، ولما كانت الظروف الامنية فى البلد تتطلب احتياطا اوسع وأشمل ، وتلك تهمة خطيرة ما كان ليصدر بها عضو مجلس شعب فى حقه وحق المجلس ، ولقد تقدم هو شخصيا بطلب رفع الحصانة مبينا فى طلبه الاسباب الداعية لذلك ، وبناء عليه اجتمعت اللجنة مرة ثانية لتقرر بالاجماع رفع الحصانة عن النائب المذكور ، واذا يعرض هذا الامر على مجلسكم الموقر و حتى تأخذ الامور مجرياتها الطبيعية فى التحقيق.

الرئيس : ولنسمع اقوال النائب سالم النجار

سالم النجار : السيد الرئيس بالفعل تقدمت بطلب رفع الحصانة لاني لست فى حاجة إليها ، ولا اخشى فى ذات الوقت سقوطها عني ، وذلك ان لم يكن امامكم فامام الله مبرنا من تلك التهم الموجهة الى ، ولما وجدت ان ذلك يسبب حرجا لمجلسكم الموقر وفى ذات الوقت اصرارا ليس بعجيب من قبل لجنة

الشئون الدستورية ، أثرت ان ازيح عن كاهلكم ذلك هم ، وإذ أني أشكر الاخوة النواب الذين وقفوا بجانبني فى الجلسة الصباحية غير موافقين برفع الحصانه عني وشكرا .

الرئيس : الاستاذ عصمت عبد الله وكيل المجلس يتفضل

وكيل المجلس : السيد الرئيس ان الحالة الامنية التى تعيشها البلاد تتطلب الحيطة والحظر، و والسلطة المنوطه بهذا الحال من حقها البحث وراء ما هو كل شائك ومشتبه فيه من قريب أو بعيد ، فلقد كثر نساجون الفتن فى الظلام مستغلين بذلك مواقعهم الحساسه فى سلك الوظائف المهمة فى الدولة غير عابئين بأمن البلد ، وأكتشافهم يعد عملا ، إن لم يكن جهدا خارقا ومشكورا للقائمين على الأمن !

الرئيس : السيد جلال محمود يتفضل

النائب جلال : سيادة الرئيس ان امن الدولة تزعم بأن النائب يتزعم تنظيمنا مناهاضا للدولة ويطلبه لسماع أقواله ، فحتى هذا الوقت لم تثبت إدانه صحيحة عن النائب ، وقد يحق لأمن الدولة سماع أقوال النائب المذكور ، ولكن الذى لا يحق للجنة الشئون الدستورية والتشريعية لمجرد الزعم أو الشبهة من ان تتخذ قرارا برفع الحصانه عن هذا النائب ، خصوصا بعد الرجوع الى المجلس للجلسة التى عقدت صباحا ووافق فيها الجميع من مختلف التيارات الحزبية على عدم رفع الحصانه عن النائب وشكرا

[نائب يطلب الكلمة]

رئيس المجلس : أتفضل

النائب : ياريس مفيش دخان من غير نار ، واللى شاييل قرية مخرومة تخر على دماغه ومن رأيي، رفع الحصانه عن النائب المذكور

[نائب من المعارضة يطلب الكلمة]

رئيس المجلس : اتفضل

النائب : دخان أيه وقربة أيه هو احنا قاعدين على مصطبة ، هو ايه اللى بيحصل ده ، هو كان عمل ايه النائب المذكور ، هل يا ترى ضبط متلبسا بتجارة المخدرات ونشر السموم البيضاء ، هل ضبط لديه كميات من اللحم الفاسد المستورد والسلع الغذائية ، هل لديه شركة مقاولات من الباطن ما تبنيه اليوم ينهدم فى الغد ، هل عليه قروض بالملايين وبدون ضمانات ، او عليه شيكات بدون رصيد مسحوبه على أى من البنوك ،

فقط يقال انه اتهام بتزعم تنظيم ، علشان ايه مربى لحيه يعم سالم (متوجها الى النائب سالم النجار)
روح احلق لحيتك علشان متترفش الحصانة عنك ، ومن يدري ربما يشفى صدور قوم

[نائب وطني يطلب الكلمة]

الرئيس : اتفضل

النائب : يا سيادة الرئيس ، اذا كان النائب هو بنفسه قدم طلب رفع الحصانة عنه معنى ذلك انه يعرف
خطورة اللي عمله ، وبكده يكون اعتراف منه على صحة التهم الموجهة اليه

[فى الركن اياه الحاج عشاوى والاستاذ محمود يراقبان الموقف]

الاستاذ محمود : شوف يا حاج ، جماعة الوطني طابخنها من بدري !

الحاج عشاوى : معناته احنا قاعدين كماله عدد ، والحصانة حتترفع !

محمود : حصانة ايه يعم الحاج ؟ كبر الجمجمه ، عموما اسمع اللي بيتكلم ده

[كان بالقرب منهما واحد ذو جسم ضخم يلبس جلبابا عاديا ويكشف صلغته ويقرأ ورقة فى يده]

النائب : وأوجه الشكر لسيادة الرئيس قائد القوات العليا (بفتح العين) سر سر يا مبارك ونحن معك
ضد الهباب (يتردد فى نطقه) أقصد الارهاب (يتحدث سرا الى جاره) هو ده خط ينقرى

[يتحول الى حوار بين الحاج عشاوى والاستاذ محمود]

محمود : سمعت يا حاج ، اهم دول الخشب المسندة الطبل البلدي ، اللي انت شايفه ده دافع ضرايب
على تجارة المخدرات ٨ مليون جنيه

الحاج عشاوى : (فى زهول) ياليلة مهببة بهباب وقطران ، هي تجارة المخدرات بيندفع عليها
ضرايب ؟

محمود : حلاوتك يا حاج دانته معندكش فكرة ، لك سنة فى المجلس ومش عارف حاجة خالص ، (صمت قليل)
انت بتاخذ كام فى المجلس ؟

الحاج عشاوى : ألف وخمسميه

محمود وسايب بلدك ، بالله عليك بيكفوك مصاريف هنا فى قاهرة المعز ، يا حاج فيه ناس ممكن
أشاورلك عليهم الساعة عندهم بتعمل شغل بالألف وخمسميه جنيه !

الحاج عشاوي : امال النائب اللي وقف فى الجلسة اللي فاتت ، وبيقول احنا افقر برلمان فى العالم !

محمود : ماهو الكلام ده صحيح من النحية النظرية اللي زى واللى زيك ، أما من الناحية العملية فهو اغنى من مجلس نواب أمريكا (يواصل كلامه) ولعلمك يا حاج لأول مرة تحصل فى المجلس وتترفع الحصانة عن نائب فى مصر يتبع حزب معارض ، طب اسمع رئيس حزب الوفد

[يقف رجل ممثلى الجسم ذو شعر أشيب ويكاد يتحامل على نفسه]

رئيس الوفد : يا ناس حرام عليكموا داخنا في رمضان !

الاستاذ محمود : حتى جماعة أحزاب المعارضة كل واحد فى وادى ، عمرهم مافكروا يحطوا أديهم في ادين بعض ، ولكن يصطادوا لبعض الغلطات !

[يتحول الحوار الى أبطال المسرح]

رئيس المجلس : حد عنده تعليق تاني قبل التصويت

الحاج عشاوي : (يرفع يده)

الرئيس : اتفضل

محمود : (فى السر للحاج عشاوي) حتقول ايه يا حاج

الحاج عشاوي : (لم يبالي بقول الاستاذ محمود) يعني ايه حصانة يا سيادة الرئيس ؟ هي جلابيه ، ولا بدله نلبسها الصبح وعند النوم نخلعها ، على حد علمي ان اللايحة داخل المجلس بتقول إذا ضبط العضو متلبساً ساعة الجريمة او بعدها ، وليس متهما ، ومن يدري ربما يكون الاتهام كيدي ، حتى ولو كان من قبل الحكومة ذاتها ، فاللى حاصل الآن إنه اتهام ليس له اساس من الصحة ، ومش عيب ان العضو يدلي باقواله داخل النيابة ، والمجلس يسمح له بذلك ، وبعدين يا سيادة الرئيس العضو اللي حيترفع عنه الحصانة بيمثل حزب معارض له انصار فى البلد ، وهو الوحيد اللي بيمثل حزب العمل من بين ٤٠٠ عضو

رئيس المجلس : نواصل فتح باب المناقشة أم يغلق !

النواب : (أكثرهم) يرفعون ايديهم لغلق المناقشة !

الرئيس : يغلق ، والموافق على رفع الحصانة يرفع يده

النواب : (أكثرهم يرفع يده بالموافقة)

يسدل الستار

(المنظر الثالث)

[نفس المكان ولكن القاعة أكثرها خالي ، الحاج عشاوي والاستاذ محمود فى مكانهما المعتاد]

(من بعيد ياتى اليه أحد النواب)

النائب : كنت هايل فى تعليقك امبارح يا حاج ، ايه رأيكم ان جماعة المعارضه عاملين أضراب فى الجلسة دى ، ايه رأيكم تشاركوهم

الحاج عشاوي : يا أستاذ جمعه اللي فات منقدرش نغير فيه حاجه خصوصا ده راى الاغلبية !

النائب : اغلبية ايه يا حاج ، دول ممكن يخربوها ويقعدوا على تلها ، آهى القاعة فاضيه ..! تقدر تقول هم فين ، كل واحد معاه أوراق يجري بها هنا وهناك عايز أمضة من ده أو موافقة من ده ، أهو كل واحد بيدور على مصلحته

[فى تلك اللحظات يدخل الرئيس ويتخذ مجلسه أعلى المنصه]

الرئيس : فين باقى الاعضاء ؟

أحدهم : كثير منهم مجتمعين فى اللجان !

الرئيس : (منفعلا) اللجان تنتهى من اجتماعاتها حالا ولن تبدأ الجلسة الا بحضور باقى الاعضاء

[يتحول الحوار الى الاستاذ محمود والحاج عشاوي]

الاستاذ محمود : اتحدى يا حاج ان كانوا فى اجتماعات اللجان !

الحاج عشاوي : امال فين ؟

محمود : مزوغين في البهو الفرعوني ، فى الكافيتيريا ، فى العيادة الطبية فى اى حاجه !

[فى تلك اللحظات يدخل الاعضاء عضو وراء عضو متحفزين]

(ماكاد النصاب يكتمل حتى هب اعضاء المعارضه واقفين)

أحدهم : سيادة الرئيس ، نحن منسحبين من الجلسة اعتراضا على ما حصل بالأمس

[يخرجون واحد تلو الآخر ، وما كاد ينتهوا حتى حل محلهم اعضاء الوطني إمعانا فى الكيد وبصورة مستفزة ، يلاحظ واحد من المعارضه ذلك وكان آخر الصف المنسحب]

النائب : انتوا قاعدين ليه ؟ مش مكسوفين بكره تخربوها وتقعدها على تلهها !

نائب وطني : احترم نفسك وشوف انت رايج فين واتكل على الله !

النائب : انت اللى زيك ملوش غير انه يقعد على مصطبه مش مجلس شعب ، ومتنساش يا محترم تكلم الحكومه يرفعوا القصب شوية ملايم ، عشان الارض اللى سيادتك زارعاها قصب ، وكله باسم الشعب مانت غول !

النائب السابق : انتوا شوية لمامه محطوطين هنا رافة بحالكم ، وبيكوا ماشيه ومن غيركم ماشيه (ويخرج من بين المقاعد ليمسك بخناق النائب المعارض ، لولا اعترض احد النواب طريقه ليمنعه)
نائب المعارضه : من حقك ، ماهى التكية اللى الجماعة فى البلد سابوها لك !.

نائب الوطني : أطلع يا منحط يا بياع البط !!...

نائب المعارضه : قال رئيس لجنة الشباب ...! ، طب روح أقعد على باب السوق فى بلدكم

الحاج عشاوي : (وهو آت من آخر الصفوف) ماطبطلوا ربح فى يومكم المهبب ده ، هو مجلس شعب ولا سويقه طب احتراما للرئيس خلاص مفيش خشا ولا وقار [يخرج وفد المعارضه عن آخرهم وهم يسبون ويلعنون فى سريرتهم]

(الحاج عشاوي مواصلا ومتوجها بكلامه الى رئيس المجلس)

لو سمحت أحاول ردهم يا ريس !

رئيس المجلس : أتفضل بس قبل ما تبدأ الجلسة

[يتغيب الحاج عشاوي خارج القاعة محاولة ارضاء المعارضه]

(يحصل لغط وتهامس من هنا وهناك وضحك من بين الحين والآخر)

نائب وطني : (لزميله) انا أقوم من مكاني والله لو ركع قدامي ماني منقول ، هو احنا تحت امرهم

نائب ثان : والله يا شيخ نظفنا منهم ، هم وراهم غير وجع الدماغ ، شايف المجلس رايق الزاى ، (مستطردا) لكن مين الحاج عشاوي اللي رايح يصالحهم ده ، اسمع ليكون عشاوي بتاع الـ (و اشار نحو رقبته وأخرج لسانه دلالة على الخنق)

زميله : آه عشاوي بتاع الاعدام ، ربنا يسمع منك يا شيخ ويخلص عليهم واح واحد

أحد النواب : (موجهها كلامه الى رئيس المجلس) ما تبدأ الجلسة يا ريس هو إحنا تحت امرهم

الرئيس : وفيها ايه لو انتظرت شويه ، متجعل نفسك من اللجان اياها ، ولا علشان اول مره بتحضر

النائب نفسه : يا ريس انا بحضر من أول الدوره بس انت اللي مش واخذ بالك

الرئيس : معلىش المرة الجايه هالبس نظاره !

[النائب اياه الذى ينام فى كل جلسه وزميله الذى يلازمه]

فوزى : (وهو يهز الحاج عباس) يا حاج اصحى شويه حتودينا في داهيه !

الحاج عباس : (وهو يتمل) ايه يا فوزى مش عايز تهينني على شوية نوم ليه ؟ ايه قامت ثوره فى

البلد ؟ حتى لو قامت ثوره مكانا محفوظ !

فوزى : ثورة ايه يا حاج ؟ مش دقوا فى بعض دلوقت !

الحاج عباس : مين المعارضه وجماعتنا

الحاج عباس : الله يخرب بيوتهم جيبين لنا الصداق دايم !

فوزى : مش أنسحبوا !

الحاج عباس : صحيح ؟

فوزى : أيوه الله

الحاج عباس : كدا الواحد يعرف ينام مضبوط !

فوزى : تنام ايه يا حاج صحح شويه ، انا شايف الحاج عشاوى داخل وجماعة المعارضه داخلين

وراه !

[يدخل نواب المعارضة ، ويتجهون نحو مقاعدهم التي شغلها نواب الوطني ولا يريدون تركها ، ويقف نواب المعارضة في انتظار ان يترك نواب الوطني مقاعدهم ويحلوا محلهم ، وتكاد تحصل مشكلة]

الرئيس : الأخوة النواب اللي قعدوا مكان زملائهم يتركوها في اسرع وقت !
(ينظر نواب الوطني بعضهم لبعض في أستنكار وضيق من زملائهم المعارضين)
أحد نواب الوطني : هو احنا تحت امرهم ! ؟

[يكاد يزداد الصخب واللغط وهم ينتقلون ويحل محلهم المعارضون]

الرئيس : الهدوء من فضلكم ومازلنا نناقش بيان الحكومة الكلمة للأستاذ عوض الله رجب **النائب المذكور:** سيادة الرئيس لقد أصبحت احزاب المعارضة واجهه او ديكورا هنا داخل المجلس ، ليس لها دور سوى أنها تكلمة عدد ، وتضيع كلماتهم وسط الزحام الذي يطلق عليه الاغلبية ، ذلك لإحتواء الاغلبية للسلطة ومحاولاتهم اقصائنا بعيد عن مشاركتهم السلطة ، إذ انهم من الواجب تداول السلطة وليس حكرها على حزب بعينه ، هذه واحده ، اما الثانية

[تتلاشى كلمات النائب ، يبدأ حوار بين الاج عشاوي والنائب محمود مسموع للجمهور]

النائب محمود : ازاي قدرت ترجعهم يا حاج ؟

الحاج عشاوي : انت تعرف ان اللي ظهر لي ان جماعة المعارضة ، زي اليتيم وسط زملائه أو زي اللي مالوش عزوة ، ويحس انه منبوز من اللي حواليه !

النائب محمود : يعني يا حاج لو اتعرض عليك تنضم لحزب من المعارضة توافق ؟

الحاج عشاوي : ولا حتى الحزب الوطني ، وعلى يدك عرضوا على ، ورغم المميزات المعروضة إلا اني بصرف من جيبي ورفضت الانضمام !

النائب محمود : بس اللي عملتوا مع المعارضة اصبحت في نظرهم متهم انك واحد منهم !

الحاج عشاوي : تعرف يا استاذ محمود ، انا اللي عايش في حلم مالوش نهاية ، دخلت على سنة في المجلس ولغاية الآن مش قادر افهم اللعب ، كل يوم يبجي ناس من البلد يشيلوني هموم الدنيا ويمشوا ، وياريت يعزروا ، اللي عايز مصلحة يفكر ان بأيدي حلها ، لا وايه يعرض عليا فلوس !

النائب محمود : طب ما هو ده اللي ماشى ، كل واحد من الموجود هنا بيخدم بمقابل !

الحاج عشاوي : مقابل ايه يا استاذ ، مش ده اللي انا بدور عليه ، انا لما انزل البلد وشوف بعيني مشاكل الناس ، عندك مثلا تمليك الاراضى المستأجرة اللي حيسري من اول عشرة ، والناس ما يصدقوا اني موجود فى البلد يترجوني ، نفسى اعمل لهم حاجة ، نفسى أخدمهم ويشعروا بكده

النائب محمود : بس مفيش في ايدك يا حاج

الحاج عشاوي : الحكومة متعرفش ايه اللي ممكن يحصل لو طبقوا القانون ده

الاستاذ محمود : وهي الحكومة مالها ، انت شايف الرؤوس الضخمة دي والكروش المنتفخة ، ثلاث أربعم ملاك أراضى ، وإن مكنش مالك ، له قريبه ، ثم تقدر تقولي كانوا فين الفلاحين من خمس سنين قاعدين ليه لغاية دلوقتي ؟

[يتحول الحوار الى نواب المجلس]

نائب : حيث أن مشكلة الدروس الخصوصية أصبحت مشكلة كل بيت ، ناهيك عن دورات المياه في المدرسة عندنا معطله ، فأين يذهب التلامذة والمدرسون (نائب الحكومة في المجلس ووزير الشؤون مجلسي الشعب والشورى يطلب الكلمة)

الرئيس : أتفضل

نائب الحكومة : سيادة الرئيس . بالنسبة لاحزاب المعارضه فوجودها ليس بديكور كما ذكر الاخ الزميل (وهو بيتسم وينظر نحو زميله) بل هم شريك لا بد من وجوده ، يشاركوا فى السياسة العامه للدولة ، ويمارسون حقوقه فى المجلس ، وأكبر دليل على ذلك وجودها الآن ، ولهم مطلق الحرية فى القول والمناقشة وما يذكرون فيه من آراء ، ووصول نوابهم عن طريق الانتخابات ، وهل وصل أحدهم الى مجلس الشعب إلا عن طريق الاغلبية ، فهل وقف فى وجه أحد ، أما الاخ الذى يذكر فى كلمته ان الحكومة تهمل دورات المياه فى المدرسة التابعة لبلدته (فى سخريه) انا زرت الاخ الفاضل فى بلده ، وهو ما شاء الله مبسوط جدا (يضحك فى سخريه وهو ينظر الى النائب) أهدء ما تتحفزش أوي كده ، يعني بإمكانه وكان اجدر به ان يصلح دورات المياه ، وخاصة انه معملش حاجه تذكر لاهل دايرته ، امال فين الجهود الذاتيه ، هي كل حاجه الحكومه ، الحكومه ، حتى دورات المياه ؟ (وما زال على

سخريته من النائب موجهها الكلام له) خلاص مش خايف يترسوا على صدرك يا محترم [يقصد الفلوس] (ويضحك، ويضحك نواب الحكومة من حوله)

الرئيس : الاستاذ جمال هلال يتفضل

النائب جمال: يا سيادة الرئيس منذ زمن طويل بدأت الحكومة تتخلى عن دعم بعض السلع الغذائية المهمة ، بالنسبة ل جماهير الشعب ، ولو انه هناك بقية من هذا الدعم فانها تتخذ مسالك غير متوازية ، فمعي رغيفين يظهر عليهما بوضوح مدى الفرق فى الدعم والاهتمام ، هذا الرغيف (ورفع لاعلى رغيف خبز بيده اليمنى) من حي الزمالك الطبقة الراقية يظهر عليه بوضوح مدى الاهتمام ، وهذا الرغيف (ويرفع يده اليسرى وبها رغيف خبز آخر) من باب اللوق حصل له ضمور واضمحلال ، ده غير انه ملئ بنشارة الخشب والانسجة القطنية ، رغم وجود أزمة في النسيج

نائب الحكومة : (يطلب الكلمة للرد)

الرئيس : (يضحك) أعمل ايه اذا كانت الحكومة هي اللي بترد ، ولا تترك لغيرها الفرصة للرد ، أتفضل

نائب الحكومة : السيد الرئيس (وفي أسلوب مشوب بالسخرية) الاستاذ الزميل يقول انه جايب الرغيف من باب اللوق عموما انا مشفتش (في سخرية موجهها لكلامه بين النواب) حد شاف أكثرهم : (فى نفس واحد) لا (ثم ضحك)

النائب : (مكملا) مش ممكن جايبه من الناس اللي بيفرشوا بعيش فى الشارع ، وعموما لو كان الرغيف من المخبز فأرجوا منه ان يجربه ، ويأكله ساعتها يعرف انه مدعم فيه فيتامين أ . ب ، مع الاعتزاز للأخت سفن وشكرا

[يتحول الحوار الى الحاج عشاوي والاستاذ محمود]

[نائب يتقدم منهما]

النائب : (وهو يقبل عليهما) مبروك يا حاج !

الحاج عشاوي : على ايه ؟

النائب : انضمامك لحزب الوفد ، بس لو كان الوطني كان افضلك

الحاج عشاوي : يا استاذ اسماعيل أرجوك ماتقولش كلام ماحصلش

النائب : يا حاج انا مجبتش حاجه من عندي ، دا كلام سمعته

(كانت هناك أصوات عاليه)

الرئيس : الرجاء من الاخوة اللي صوتهم عالي الهدوء

الحاج عشاوي : (ينهض فجأة) يا سيادة الرئيس يا ريت لو كل اربع بدل تعطي الكلمة لواحد

بجلابيه !

الرئيس : (مبتسما) طب أفضل يا حاج عشاوي

الحاج عشاوي : ياريس من كام يوم كنت في زيارة لأهالي الدائرة ، مافيش على لسانهم غير قانون

الارض المستأجرة وعودة الارض لملاكها الاصليين

(يبدأ اللغط والصخب ، وتبادل النظرات الواجمه بين النواب ، ينهض الحاج عشاوي في أستنكار ،

مواصلًا) سيادة الرئيس أكثر من نص الفلاحين مستأجرين ومش مصدقين إنه في يوم وليله يتركوا

الأرض .

الرئيس : يا سيد عشاوي الموضوع ده باعتباره منتهي وفي شهر ١٠ سوف تعود الارض الى

اصحابها ، الأستاذ حلمي

حلمي : السيد الرئيس ، السيد وزير التربية والتعليم

لن اخوض في مسالة الدروس الخصوصية ولا مدى صلاحية الامية التعليمية ، فلقد اكثر زملائي

النواب في الكلام في ذلك ، ولكن من اراد الوقوف على مدى تقدم ورقي شعب من اي شعوب الارض

فالسبب هو العملية التعليمية القائمة على اسس سليمة وفي فترة قياسية ، ولنا اسوة في كلتا الدولتين ،

اليابان والمانيا ، فقد انطلقنا من وراء الحطام والخراب الذي لحق بهما ، ليس اكثر من سؤال ، أود

اسأله للسيد الوزير ، عن واحدة من تلك الاسس المفقودة في نظامنا التعليمي ، يا ترى ماذا عن تلك

البطاقة الصفراء ؟ التي تلازم ملف الطالب في مراحل المتعدده ، والتي بمسوداتها المتعدده تتساءل عن

أحوال الطالب الإجتماعية والأخلاقية ، والابداعية والنفسية و الصحية ، فلا من مجيب لها حتى ولو

بعلامة صح أو خطأ ؟ و لأنه ليس هناك تقييم من أصله عن احوال الطالب في خلال مراحل التعليم

التي يمر بها ، إنتهاء بالجامعة والتي بالأمكان لو عني بها من قبل المهتمين لربما كان هناك رجال

علماء فى شتى التخصصات ولكن و أسفاه ، فهل تفضل الاب الرحيم أن يبين لنا لماذا عدم الاهتمام بتلك البطاقة الصفراء ، والتي بلونها تعد علامة أذار لأمة تعدادها أكثر من ستين مليون

الرئيس : السيد الوزير يتفضل

الوزير : لا شك ان سؤال الاستاذ حلمي جدير بالأهتمام . لذا ارد عليه . إن ما احمله من اعباء تركه ،لهو ثقيل ولست املك عصا سحرية بين يوم وليلة أغير بها نظاما قائما منذ مئتي عام ، وبالنسبة للبطاقة الصفراء ، سوف نوليها اهتماما ان شاء الله فى المستقبل القريب ، فلربما عن طريق هذه البطاقة نتعرف على احد عشر لاعبا كرة قدم يمثلون منتخبا لبلد تعداده ستون مليون وشكرا

الرئيس : ولذلك نكون قد وصلنا الى نهاية الجلسة والتي بنهايتها يكون قد تكلم حتى الآن ٢٧٦ عضوا فى أول سابعه برلمانية ، على ان تعقد الجلسة القائمة يوم السبت يوم الموافق ٢٩

ستار

المنظر الخامس

فى البهو الفرعونى داخل المجلس المنظر يمثّل البهو ، عدد من النواب منهم الجالس والآخر يجى ويذهب وحوارات مثنى وثلاث ورباع ، الحاج عشاوى يدخل وينظر يمينه ويساره يبحث عن صاحبه ، الاستاذ محمود الذى يجلس فى ركن غير بعيد ، يذهب اليه الحاج عشاوى

الحاج عشاوى : سلام عليكوا

الاستاذ محمود : أهلا فينك يا حاج مش باين من مدة

الحاج عشاوى : كنت فى البلد

محمود : أتارى وجهك منور كلت الفطير و البط والوز !

الحاج عشاوى : وهو أنى ناسيك !

محمود : وأخبار الشغل ايه ؟ بالمناسبه المخازن اللى عندك إيجار ولا ملك ؟

الحاج عشاوى : إيجار ايه وملك ايه سبق وقلتلك إيجار ، ليه ؟

محمود : ما عندكش فكرة اليوم مناقشة اقتراح الحكومة بسن قانون ايجار المحلات !

[يتقدم نائب منتفخ البطن يسلم عليهما ويعد كلمات المجاملة المتبادله]

النائب : ياريت يا استاذ محمود تفهم الحاج عشاوى الموضوع اياه ، عشان لو حصل تصويت يكون

فى الصورة عنده علم

[ثم يتركهما]

الحاج عشاوي : (فى تعجب) تصويت إيه وصورة إيه ؟

محمود : (فى عدم اهتمام مسطنع) الموضوع اللي كنت بتكلم فيه ، أصل الحكومة مقدمه مشروع قانون ، وجماعة الوطني عايزين يصوتوا عليه بالموافقة من غير شوشرة !

الحاج عشاوي : (يهز راسه فى سخرية) آه آه مكايده فى المعارضه !

محمود : (يمت شنتيه) يعنى !

الحاج عشاوي : (فى حالة حزن وقد رسم نظرة الى الأرض)

محمود : مالك يا حاج ؟

الحاج عشاوي : (يتطلع فى وجه الاستاذ محمود) شوف يا استاذ كل واحد بيغني على مواله ، فيه اللي بيقول يا عيني ياليل في نفس واحد ، وفيه اللي من شدة الالم بيقولها طول الليل (صمت قليلا وفى نبرة حزن) يا أستاذ انا سايب وراياى نص فلاحين الدائرة فى هم وقلق وحزن مالوش آخر ، عشان موضوع تسليم الارض ، كلهم يروحو فين بعد التسليم كلو واحد فيهم مربوط بأصول وجزور مايقدر يقطع واحدة منهم ، يمكن حكاية إيجار المحلات أي زياده فيها كله على حساب المستهلك وعلى الأقل المؤجر له حرية الاختيار ، لكن ما بالك بالفلاح هو والارض واحد ، لو انقلع يموت ، دا على مستوى الخريجين ببشكوا من قلة الخدمات لما أكثرهم ساب الأرض

محمود : (مقاطعا) طب يا حاج ، كانوا فين الفلاحين من خمس سنين لما القانون أصدق عليها ومن أعلى !

الحاج عشاوي : وايه اللي كان مطلوب منهم يا استاذ هه ، كانوا يمسكوا الشوم ويحاربوا الحكومة ، ولا كانوا يجو يتكلموا في مجلس الشعب ، يعملوا إيه اذا كان اللي بيمثلوهم ناس لهم مصلحة في كده ، ثلاث تربعم عايشين فى مصر ، بس ساعة الانتخابات يفكر إن ليه أصل في بلده الفلاحين ، والعجيب ان الحشاكلة بتوعه ربنا مكثر فيهم (فجاءة) انا عايز اقدم مشروع قانون .

محمود : (مزهول) مشروع قانون مرة واحده ؟

الحاج عشاوي : هو فى على مرتين !

محمود : مش ممكن !

الحاج عشاوي : (متسائلا) ليه ؟

محمود : من غير ليه ، ده مجلس سيد قراره !

الحاج عشاوي : تاني سيد قراره ، فى البلد يقولوا سيد قراره وهنا تقولى سيد قراره ، مين بقى يكون سيد قراره ؟

محمود : هم فى البلد قالوا لك سيد قراره !

الحاج عشاوي : آه واحد صاحبنا بيقول دول عيله فى المجلس ، إخوة وولاد عم وسيد يبقى الكبير بتاعهم ، بيني وبينك مارضيتشى اتطقس واسأل

محمود : أحسن يا حاج انك مسالتش ، أحسن حل انك تقدم طلب إحاطه للوزير

الحاج عشاوي : والله الرأي رأيك

[تتعالى الضحكات للحاضرين اكثرهم وقد خلع حذاءه للتلميع ، يمر شخص بثياب مبقعة بلون الورنيش المختلفة على الطاولة التى يجلس عليها الحاج عشاوي والأستاذ محمود يعرض عليهما لوحة ورقية مقواه وذلك بدلا من الاحذية التى سوف يخلعونها ليضعوا عليها أرجلها]

لامع الاحذية : تلمع يا باشا

الحاج عشاوي : (ينظر بدون اهتمام للامع الاحذية ثم يخلع حذاءه)

محمود : مابلاش يا حاج الجلسة حتبدا حالا !

الحاج عشاوي : يعني جات من دقيقتين يا أستاذ محود من يوم ما دخلت المجلس ، وأنا أول واحد

يكون موجود ، ثم لو دخلنا دلوقتى ماتلفيش ربع الموجودين !

[فى تلك اللحظات يسمع عبر السماعات التى فى البهو وتنقل من منصة المجلس مباشرة ، يسمع حوار

دائر بين أحد النواب ورئيس المجلس]

الحوار الدائر : يا سيادة الرئيس قبل ما تبدا الجلسة ، أذكر سيادتك ان النصاب القانوني للحضور لم

يكتمل ، آ آ ... ماشى ماشى

[أحد النواب سمين يلبس جلبابا يلدي اصلع الرأس يجلس بدون حذاء ، تحت رجليه ورقة مصقوله

وبجانبه ملف من الاوراق

النائب أياه : (لزميله) ماهو نفس الموضوع بيان الحكومة واقتراح قوانين الايجار للمحلات والذي
منه ، الحمد لله لافى عماير ولا محلات !

زميله : هنيالك الطين يا عم !

النائب : مش عارف ليه؟

النائب : عايزين كام إمضه (ثم يقترب إليه ويهمس فى أذنه و الآخر يهز رأسه)

[يسمع عبر السماعات]

الأخوة النواب خارج القاعة وفى اللجان يحضرون حالا حتى تبدأ الجلسة

الحاج عشاوى : (بصوت عالى الى لامع الأحذية) شهل يابني شويه

نائب آخر : وهى يعنى لازم تكمل بينا ، طب ما احنا سامعين هنا

زميل مقابل : على رأيك ما انت بتدخل تكملها نوم (ثم يضحك)!

الاستاذ محمود : (للحاج عشاوى) يلا يا حاج الا العملية اخدت حقها قوى

الحاج عشاوى : يلا يابني هات الجزمة فى يومك المهبب دة

لازمع الاحذية : طب شوية يا باشا انا لسة هبدأ فيها

الحاج عشاوى : اتفضل ياعم بيقولى يا باشا (بصوت عالى ونبرة ساخرة) الله يخرب بيتك يا سليم

باشا

محمود : مين سليم باشا ؟

الحاج عشاوى : دة واحد بلدياتى (ينتظر قليلا) الله يخرب بيتك يا حاج حمزة

محمود : (فى عصبية بعض الشئ) مين حمزة ؟

الحاج عشاوى : دة واحد بلدياتى كانوا السبب (ينتظر قليلا) الله

محمود : (مقاطعا ومنتفضا) مين تانى

الحاج عشاوى : يجيب اللعواقب سليمة

محمود : مالك النهاردة يا حاج ؟

نائب : (بصوت عالى) يعنى الحكومة تبين بيان وفى نفس الوقت تقدم اقتراح قانون ، واحنا ما علينا إلا الموافقة ، مش عارف احنا هنا فى المجلس بصمجية ، وذن من عجيب وودن من طين طب مالو الاقتراح إالى مقدمو ، على الاقل معمول على دراسة وافضل من اقتراح الحكومة

زميل له : طب هو انت قدمته واتفرض

النائب : ايوة يا سيدى اللجنة رفضته

زميله : عموما المسموح بيه حاليا بوقين حلوين ضد ننتياهو

النائب : اه ما هى الخيبة إن النتن ده صريح أكثر من اللازم ، تقدر تقولى هى المستوطنات اول مرة بتحصل ، طب ماهى حكومة العمل هى اول من وسع فى بناء المستوطنات فى السر ، بس النتن احلى ما فية انة صريح هاعمل يعنى هيعمل ، وصراحته هى إالى حرجت موقف الزعماء العرب ، كشف الرمال عن الرؤوس المدفونة

الحاج ع شماوى : (للأستاذ محمود) هو فيه من السياسة ؟

محمود : كله من ده وإنت جاى

الحاج ع شماوى : بس ماليش فى الموضوع ده !

محمود : يعنى هتروح فين يا حاج ، إنت اولى بسبعين اهيف لغاية ما يجى دور طلب الاحاطه

الحاج ع شماوى : تعرف يا استاذ محمود انا اول مرة يجينى كابوس من اول ما دخلت المجلس

محمود : خير إن شاء الله يا حاج

الحاج ع شماوى : انى مروح البلد وواحد عربية مخصوص ، والناس شمت خبربوصولى طلعاوا على بالشوم والعصى يكسرو فى قزاز العربية (وهو فى حالة سرحان) إطلع يا ع شماوى إطلع يا حرامى (يقوم من مكانة) وآنى اقول يا ناس حرام عليكم انا مبيديش حاجة طب روحوا مكانى ، فجأة شيخ ضعيف عمال يسأل ، الناس تو ما شفوة فتحولو الطريق

[أثناء ذلك رجل بدين يرتدى بدلة يدخل القاعة البهو على حين غفلة من النواب والحاج ع شماوى يواصل سرده ، ما إن رأوه حتى بادرهم بقوله [إنتوا قاعدين هنا وسايبين الجلسة] أذا بهم يهرولون متخبطين فى بعضهم نحو الباب المفضى إلى قاعة المجلس أكثرهم حفاة ، تاركين ورائهم صفا من

ستار

المنظر السادس

المنظر كالمعتاد داخل المجلس

رئيس المجلس : هذه الجلسة خصت لقرارات الحكومة الإسرائيلية التي اتخذت بشأن إقامة مستوطنه ابو غنيم فى شرق القدس، وتعليق النواب حولها ، الأستاذ حماد عبد الله يتفضل

النائب حماد : أولا نحى الرئيس محمد حسني مبارك على زيارته الناجحه الى واشنطن والتي حققت أهدافها المرجوة ، وليعلم الجميع اننا أصحاب سلام و، وأن ما يحدث فى القدس من بناء مستوطنات يعبر عن عدوانية الحكومة الإسرائيلية وتحديها للمجتمع الدولي ونسف عملية السلام ، او الرجوع بها الى الوراء ، وترديهم دائما بانهم غير مقيدين بما حصل في اوسلوا من توقيع معاهدة السلام بين أطراف السلام وذلك برعاية كلا من أمريكا وروسيا

رئيس المجلس : على عبد النبي

النائب على : ان ما يحدث فى القدس لهو سبب قوي أن يجتمع العرب على مستوى الرؤساء والملوك فى قمة عربيه عاجله واتخاذ اللازم من اجراءات لردع هؤلاء الطغاة

[يتحول الحوار الى الحاج ع شماوي والاستاذ محمود]

الحاج ع شماوي : حتى طلب الاحاطه أعالوه للجنه دون مناقشته واللجنة أعالته على الرف ، طب أيه يوصل شكواي الفلاحين ، بلا شده كله زعيم حزب الأغلبيه قدامه ثلاث الاف شكوى من الفلاحين حيقدر يطنش الشكاوى دى

[نائب ياتى نحو الحاج ع شماوي]

النائب : صحيح يا حاج انت طالب الكلمه فى الجلسه دى !

الحاج عشاوي : ايه حرام ؟

النائب : آتاري يا حاج انك سياسي مخضرم يا ترى حتقول حناكي ولا من ورقه ؟

الحاج عشاوي : حناكي يا باشا (بسخرية) لأن دى مش عايزه مفهوميه ، طول ما احنا مدين ايدينا بالسلام يبقى فيه ذل وهوان

النائب : الله الله بس بس انت يا حاج بتقول الكلام ده

الحاج عشاوي : ايه فيه حرمانيه ؟

النائب : انت عايز تودي نفسك فى داهيه !

الحاج عشاوي : ايه حيسحبوا الحصانه مني ؟

النائب : يا ريت دى فيها سحب على اوضة العمليات !

الحاج عشاوي : قالوك عايز اعمل عمليه ؟

النائب : هى عمليه دي عمليه فى النافوخ

رئيس المجلس : عشاوي محمد أمين

[يحصل اضطراب مفاجئ للحاج عشاوي لعدم توقعه أن الكلمه له]

الحاج عشاوي : (وهو يتلعثم وينظر حوله) سيادة الرئيس (يطيل فيها)

محمود : (هامسا له) اثبت يا حاج

الحاج عشاوي : (محاولا استعادة ثباته) يا سيادة الرئيس أنى علوز أقول كلمة ، أنا اتفق مع النواب

إن اللى بيحصل فى القدس ميرضيش عدو ولا حبيب ، وعموما دي مش اول مره بتحصل ، لكن اللى

خايف منه يا ريس ان شبيهه منه حيحصل على أرض مصر خصوصا فى شهر عشره اللى جاي

[تتحول القاعة الى صمت مطبق] (مواصلا كلامه) يا ريس اللى بيحصل فى فلسطين بين عرب

وإسرائيليين ، لكن اللى بيحصل فى مصر بين مصريين والكل اهل واحد ، الفرق ان هناك مافيش

شرعيه تجيز لليهود سلب أراضي فلسطين ، واما هنا فيه شرعية القانون الظالم الذى يجيز طرد

الفلاحين من الأراضي المستاجرة

[تضج القاعة بالمهممات والأصوات العالية]

رئيس المجلس : يا عشاوي الموضوع ده سبق وانتهينا منه

الحاج عشاوي : يا ريس أرجوك اكمل كلامي ، زعيم حزب الاغلبية الأستاذ فؤاد امامه آلاف الشكاوي من الفلاحين ، وفي الدايره عندنا الفلاحين يشكوا لى وبيصرحوا انح تحصل مشاكل لا حصر لها عند التسليم ، وبعدين انتوا ما أخذتوش راي الفلاحين !

الرئيس : أزي يا عشاوي هو مش فى نواب عن الفلاحين؟

الحاج عشاوي : لا يا ريس ولو فيه نواب ماكانش ده حصل ، وبعدين مش عيب لو الحاج سيد قراره يتراجع عن قراره !

نائب الحكومه : (يطلب الكلمة للتعليق على كلام الحاج عشاوي)

الرئيس : أفضّل

نائب الحكومه : الحاج عشاوي (فى تهكم) عايز الحاج سيد قراره هه (يضحك في سخريه كعادته) قصده نواب المجلس المحترمين ، أنهم يتراجعوا عن قانون تم أقراره من خمس سنين ومصدق عليه من أعلى ، وناسى ان الدوله تقوم حاليا بعمليات استصلاح اراضى ليتم تسليمها للفلاحين عوضا عن التى تركوها

وناسى انه من شويه كان يجلس فى البهو الفرعوني ولما شافني (بيتسم في سخريه) طبق على جوز الجزمه اللى كان بيلمعه ، ودخل المجلس جري لولا وقفته لغاية مالبس الجزمه

(تضج القاعة بالضحك خاصة نواب الوطني)

الحاج عشاوي : (يرفع يده طالبا التعليق)

الرئيس : اتفضل يا عشاوي

الحاج عشاوي : الاستاذ " مفيد " كلامه فى شئ من الصح بخصوص النقطة الاولى،أنا شايف انه مش عيب التراجع عن قانون في حد ذاته ممكن يضر بمصلحة البلد ، خصوصا ان أصحاب الاملاك مش ناقصين غنى فوق غنى ، والفلاح بيزيد فقر فوق فقر ، وزى السمك لو طلع من الارض يموت ، ثم حكاية الاراضى اللى مستصلحه غير معقول انها تكفي آلاف الفلاحين فى مصر كلها !

وأما اللى حصل فى البهو الفرعوني انا منكرش انه حصل لي، بس لي شرط واحد، ينكشف على رجول الاخوه النواب الحاضرين فى المجلس واتحدى ان ربعمهم يجلس بدون جزم (وهنا تضج القاعة بالضحك والتتمته خاصة المعارضين ناهيك عن كثير الذى ينظر الى أسفل شكافى نفسه والمتيقنين كذلك)

رئيس المجلس : التصويت على قفل باب المناقشه

[الكثير يرفع يده موافقا على قفل باب المناقشه] (مواصلا)

يقفل باب المناقشه

المنظر السابع

نفس المنظر - تغيير طفيف في انتقال بعض النواب من أماكنهم المعتادة الجديدة في هذه الجلسة ووجود وزيران لحضور المناقشة هما وزير الاوقاف ووزير الصحة
رئيس المجلس : والآن تم مناقشة القضية العلمية للإستتساخ وجدواه في الحياة البشرية ، فليتفضل السيد وزير الاوقاف

وزير الاوقاف : إن عملية الاستنساخ مرفوضة رفضا قطعيا بل ومحرمه شرعاً ، إن المبادئ الإجتماعية والاخلاقية والدينية ترفض ذلك الصنف العلمي الذي سوف تترتب عليه مضارات مدمرة للبشرية خاصة ، وذلك حينما يتلاعب بالجينات الوراثية التي تحمل المورثات الأنسانية عبر الأجيال والتاريخ ، ليأتي اليوم الذي يتحول فيه البشر الى مسخ وأجساد تتحرك دون وعي أو فكر وربما أدى ذلك الى وجود جيل هو أقرب في تصرفاته الى البهائم ، وبذلك يقضى على أهم ما يميز به البشر من عقول وقلوب واعية ، ومن يدري تبقى فئة قليلة نتحكم في هاؤلاء وتسيرهم كما يسير الراعي قطع اغنامه.

السيد الرئيس ، لقد علم خطورة ذلك كبار رجالات العلم العملية ، في حد ذاتها مدمرة للبشرية من حيث لا ندري ، وشكرا

رئيس المجلس السيد وزير الصحة ليتفضل

وزير الصحة : قضية الأستتساخ قضية علمية ، ويجب النظر اليها نظرة موضوعية فما من شئ إلا وذى وجهين

فالبكتريا مثلا كانت أهم أكتشاف علمي لها منافع ومضارات وذلك حسب استخدامها ، الكهرباء من أراد ان يهون من قيمتها وينكر وجودها فاليجرب ويمسك بأسلاكها ليرى ماذا هي فاعلة به وكذلك المعامل النووية بأمكانها تدمير الكرة الأرضية والبشرية ، وبالأمكان استخدامها لمنغعة البشرية فهي تمدها بأكبر طاقة للحياه

[حوار جانبي بين الحاج عشاوي والنائب الاستاذ محمود] ب

الحاج عشاوي : ايه حكاية الاستنساخ دي ؟

محمود : انت يا حاج مسمعتش عن النعجة دولي ؟

الحاج عشاوي : (في تعجب) نعجة !

محمود : آه نعجة

الحاج عشاوي : واسمها دولي

محمود : هيه اسمها دلال واسم الدلع دولي

الحاج عشاوي : طب وايه اللي دخل دلال قصدي النعجة فى الاستنساخ

محمود : آوه ، دى حكاية طويله ، مش وقته ولا مكانه

[بيرز صوت الوزير الذى مازال يواصل خطابة]

الوزير : ولقد استخدمت هذه العملية من وقت غير بعيد فى تهجين النباتات وبالطبع فية معنا من السادة

الاعضاء الفلاحين (فى شئ من الهذر) فيه ولا لآ ، اية مافيش فلاحين ؟

الحاج عشاوي : (فى تحدى) ايوه يا معالى الوزير ايوه أنى فلاح وابن فلاح

الوزير : طب هسأل سيادتك ، سؤال فدان القمح كان بيحبيب زمان قد ايه ودى الوقت بجيب محصول قد

اية ؟

الحاج عشاوي : والله يا معالى الوزير زمان أحسن فدان كان بجيب اربعة ارادب إن كترت خمسه

الوزير : آه (وكأنه منتصر) ودى الوقت

الحاج عشاوي : دى الوقت ماشاء الله بجيب أقله عشرين فيما فوق

الوزير : ولقد عرفت البشرية من القدم عمليات التهجين، وأشهرها مثلا البغل وفي القرآن الآية المذكورة " والخيل والبغال والحمير لتركبوها وزينة " وطبعا الجماعة الفلاحين عارفين البغل نتاج إيه **نائب :** (يقف مفاجأةً يرتدى جلباب) إية حكاية الفلاحين مالك يا سيادة الوزير نازل على الفلاحين سلخ هي كل حاجة على دماغ الفلاح

الوزير : بلاش البغل ، حيوان السلعوة أكتشف إنه نتاج ذئب وكلبة!

[يتحول الحوار بين الحاج عثماوى والاستاذ محمود]

الحاج عثماوى : إيه ده يا أستاذ هو الفلاح حظة مهيب لية هم ناوين يحجروا على البهايم ولا إيه ، ما تقول يا أخى ولا اقوم اتكلم

محمود : تقوم تقول إية يا حاج ، ده كلام علمى حافهمهولك بعدين

[يتحول الى خطاب الوزير الذى مازال مواصلا إياه]

الوزير : إذا فعلية الاستنساخ لا يجب إليها النظر من وجه واحدة فأوجه المنافع فيها متعددة وكثيره بالأمكان ان تخدم البشرية، كما حصل لسابقتها من الاكتشافات العلمية التى تخدم البشرية

رئيس المجلس : السيد فضل الله محمود

[يتحول إلى الحاج عثماوى والاستاذ محمود]

محمود : أسمع يا حاج، ده بعبع الحكومه

[يتحول الى النائب المذكور]

النائب : أستنساخ إيه يا سيادة الرئيس ، اللى يسمع مناقشات معالى الوزيرين يقول ماشاء الله علينا ، وإن المعامل العلمية بأنوعها المتعدده، بدأ من معمل المدرسه ونهاية بأكبر الصروح العلمية فى الجامعات المصرية ، وكأنه تخرج علينا كل يوم بأكتشاف جديد يهز العالم ، ورغم ذلك فمصر هي الدوله الوحيدة التى بها عدد من عمليات الاستنساخ ليس بموجود فى إى دولة أخرى ، أولها بدأ فى عام ١٩٧٨ تم أستنساخ حزب مصر بالحزب الوطنى الديمقراطى ، وإن كان برأس مختلف

رئيس المجلس : الاستاذ العضو لا يجب إن يتعدى حدود النقاش العلمى

النائب : (مواصلا) يا سيادة الرئيس حزب مصر كان الرؤوس زمان صغيرة كى تملأ الطربوش أما
والآن (مشيرا نحو النواب) ، فالرؤوس ماشاء الله ضخمة وصلعاء.

ياسيادة الرئيس إننا أول دولة تستنسخ قانوناً جاهلاً لا يقرأ ولا يكتب ، وله الحق فى رفض تقارير
محكمة النقض، ويعطيه القانون الدستور الحق فى رفض تقارير محكمة النقض، ويعطيه الدستور الحق
فى التقدم بمشروعات قوانين تحكم حياة الناس فى عصر التقدم التكنولوجى والمعلومات والاتصالات
الرئيس : إنت كده زودتها اوى يا فضل الله

النائب : (مواصلا) يا سيادة الرئيس نحن الدولة الوحيدة التى أستنسخت قانون الطوارئ ، الدائم بينما
فى دول العالم لمدة مؤقتة !

[النواب يتنافرون وتعلو الاصوات المعارضة والاشارات لرئيس المجلس بالانتهاء أو اخراس هذا
النائب] (مواصلا) بل نحن الدولة الوحيدة التى تستنسخ نوابا
إيديهم مثبتة لأعلى لزوم الموافقة ، الدولة الوحيدة التى أستنسخت أصوات الاموات بدلا من الاحياء فى
الانتخابات !

الرئيس : كفاية يا فضل الله ، الاستاذ

النائب : يا سيادة الرئيس أخلص كلامى

الرئيس : اتفضل أقعد يا فضل الله والا بتتحول إلى مجلس تحقيق

النائب : يا سيادة الرئيس ، نحن الدولة الوحيدة التى أستنسخت الموظفين *الحباكين الدولاريين
لاستمراء قوت الشعب ، الدولة الوحيدة التى أستنسخت محليات لولاها لأستغنيا عن الاجهزة الرقابية
(وهنا ترتفع الاصوات وتداخل تطالب بالجلوس لهذا العضو)

الرئيس : كذا ألغى الجلسة

النائب : خلاص يا رئيس بلاش اكمل كلامى طالما ديمقراطيه الظل ، ظل الحزب الواحد والرأى
الواحد والحاكم الفرد والنتخابات المزوره

الرئيس : (بنرفذه) ع شماوى أمين

الحاج ع شماوى : يا سيادة الرئيس معالى الوزير فى كلامه بيضرب بالفلاح المثل وبالحمير والبغال

الرئيس : او عى يا عشاوى تقول أستأجار الاراضى والفلاحين

الحاج عشاوى : يا ريس المقصود ليه الفلاح دايمًا حظه مهيب حتى فى المجلس ، طب عندك مثلاً ،
الحلوفه والخنزيرة والشبح والتمساحه العربيات فى الكراج ، ليه سيادة الوزير مضربش بيها المثل على
عمليات الاستنساخ ، هل يقدر سيادة الوزير يقول مثلاً العربية دى ، نتاج عربية خيل ولا عربية
طرنش طب الخنزيره نتاج عربية فول ولا عربيه يد ، بلاش ده كله التمساحه دى

الرئيس : (مقاطعا) مالك يا عشاوى اية دخل الخنزيرة والشبح وحلوفه وعربيات الخيل ، الظاهر
والله وأعلم إنكوا مستنسخين الجلسة دى

الحاج عشاوى : يا ريس عاوز أفهم دول نتاج اية ، لكن أقول دول نتاج الغنى يزداد غنى والفقير
يزداد فقر وتانى نظلم الحيوان ومحدث يقدر يقول ، البغل فى الابريق

الرئيس : التصويت على قفل باب المناقشة (ترفع الايد الكثيره) موافقون

ستار

نهائى

توثيق الشهر العقارى

١/٩١/٢

٢٠١٤/١٠/١٥

٦٩٧٢